


928
4
5

陳迦陵文集

五





陳迦陵儷體文集卷七

宜興陳維崧其年誤

無錫秦松齡留仙

逸

弟

維岳緯雲

大倉黃與堅忍菴

宗石子萬

男履端

姪 洵 校

序

家皇士望遠曲序

和陸麗京計甫草韻幀首有十三女子繪望遠圖

嘗觀蕩子從軍明鏡有刀環之賦吳姬織素飛龍生藥店

之悲郎食鯉魚之尾授色恩情妾燒玳瑁之簪傷懷訣絕

廬江小吏愁孔雀之東南鄴下名王恨浮雲之西北莫不

手褰寶帳速望人來坐擁金屏恐令春去則有四姓良家

三河妙族幼住石城之下長貯金屋之中趙家姊妹本姓  
爲樊楊氏諸姨賜名爲號檀黃染靨人傳巧笑之方石黛  
添蛾家有莫愁之曲金蓮擬步誰讓潘妃白雪如人何殊  
甘后芙蓉承輔豈煩傅粉之粧蘭麝沾膚奚假薰香之術  
螭蟾粉項偏宜白燕雙釵楊柳纖腰解映綠狸重席兄居  
協律原識佳人姊在昭陽新稱皇后誠可謂天上無雙宮  
中第一者也然而棄妾鳳城之南思子狼河之北歲歲征  
遼空爲天子年年服散徒作姬人妾齡十五已爲離別之  
時郎路三千大有相思之曲看銅街之走馬息意櫻桃聽  
珠閣之吹簫忘情荳蔻人傳虎帳新移光祿塞邊客曰牙  
旗舊駐臙脂山下粧臺疑惑繡戶徘徊寄摩敦之紫襖心  
傷周室之宇文贈妃子以金環目斷齊朝之斛律王孫質

趙何日言歸公子留秦無時云返其人也如此其遠也如  
彼於是盤龍縮髻獨上高臺墜馬明粧廣開寶堦青天碧  
海竟無桂樹之期白晝黃昏又下藁砧之淚餘香不斷自  
洗滌衣剩粉猶存私留窮袴三春永巷豈有恨於君王萬  
里長城復何心於歌舞庶幾化石猶尋道上之夫莫便升  
天竟竊月中之藥爰命江南幼女河內嬌娥繪以丹青圖  
之紈素紫綃不定竚瓊觀以卷衣羅帶將移睨碧虛而垂  
手漢武帝之徬徨帳後是也非耶衛宣姜之髣髴君前天  
平帝矣所以西陵松栢不無歎息之人禾水鴛鴦嗣擬綢  
繆之作也吾家閨閣亦有新聲此日封胡遂填別體敢曰  
難兄惟法護著此青箱或云愛弟有清河屬之玄晏嗟乎  
蛺蝶成灰別歡五載珊瑚製枕待子三年處姊尚未適人

小姑何嫌獨處須知新婦難配參軍豈有才人乃歸廝養  
抱衾裯於星下誰適爲容浣粉黛於窗前各言其志云爾  
香奩上官二序不能獨勝曲終奏雅出乎忠孝使人讀  
之慨然 吳梅村先生

作賦之家意在言外不得唱歎餘情卽屬俯仰靡麗其  
年留心今古嘗有獨立之時情淡而文此序徵之矣 伊  
璜評

亦山草堂南曲序

仲弟半雪作亦山  
草堂其堂名也

今夫銅雀臺南惟餘松柏瓊花觀北不見鴛鴦王孫丁巳  
國之辰公子正離家之日姚弋仲之悲哀何極疇昔可知  
毛修之之淪落奚窮生平已矣何況陸機盛齒大去東吳  
蕭綜麗才長歸北魏賦金蓮之步寧暇言愁歌玉樹之花  
焉能不恨於是銅街年少爭寄意於才情金埒文人半陶  
懷於風調擲茱萸而送客自許清狂攀石榴而贈人相傳  
輕薄羨韓家之椽頗愛熏香問霍氏之奴偏能買酒靡不  
蓄薇作曲體號連環梔子爲篇歌稱碎錦長誇綉虎豈無  
玉枕之年小字盤龍大有金釵之夜洵足以送愁天上行  
樂人間矣偶逢養炬亦擅新聲竊喜封胡能爲南搵黃金  
作軸解過樓前紫玉爲鈴私隨車子南齊范擘琵琶或曰

無雙江表桓伊長笛命爲第一固已城東巧筴曲與人同  
河北蛾眉歌將面等嗟乎叔寶情人畏聽金陵之樂牧之  
蕩子愁過明月之橋銀雁飄零誰爲供奉翠蟬鳴咽總是  
燕支黃羊野馬已知皆河北之人皓齒紅牙何物是江南  
之曲況乎關河風月頗足傷心臺榭綺羅都爲觸目徐之  
才之帳底淚濕羅巾李商隱之奩前心灰絳燭五更白馬  
偏向人鳴一夜棲鳥又憎人別粉濃袖口想像同心花近  
釵頭依稀連理僕本斷腸之輩怯見金荃余尤矢志之人  
愁親錦瑟歸之予仲序以短章

余澹心鴛鴦湖傳奇序

原夫玉樹歌殘心傷後主霓裳曲冷霓斷明皇紅顏沉戎  
馬之中皓齒遭亂離之會怨夫人於花莊三千歌舞空歸  
贈妃子以金釵十二管絃安在才人結帶應有恨於當年  
公主梳頭復何心於今日帳爲玄蛤夜夜多愁席號綠熊  
年年是淚加以幼住青樓長家朱雀趙家姊妹皆擅傾城  
秦國弟兄俱推巧筴西曲以紅珠代夜南方多白玉爲人  
翡翠簾開時招紫燕眞珠船上慣戲文鴛曲瓊以繡線爲  
綉綵竿用文椒作檝爐添寶獸偏燒荀令之香瑟隱銀蟬  
解作韓娥之曲於是油車雜沓寶馬駢闐明鏡爭開對照  
芙蓉之面紫瑜並坐爭歌楊柳之腰十五霍家難倚將軍  
之勢三千楚館不知夫婿之名本期雲雨長行常依巫嶺

豈料烽烟不斷頓隔蓬山釵除却月已爲馬上之人袖散  
回風便作軍前之客懷中玉笛誰忘舊日之寧王枕底丹  
鞋暗泣前朝之李后遇龜年於劍外無非故人紅豆之悲  
逢白傅於江州大有知己青衫之感西宮秦曲猶尋故伎  
於平康北寺鳴箏尚作新聲於長樂蛾眉失路原同庾信  
之哀螭首離家大似江淹之賦固知蠲愁有術難蠲弱女  
還夫合浦乘龍覓婿卽值征人得意之年躍馬封侯亦自  
少婦爲歡之日五銖羅袂依然畫閣之旁百子步搖宛矣  
玉釵之側人憐嬌鳥重入金籠客訝名花還歸寶砌誠太  
平之盛事亦離亂之良緣則有江東才子河內名家譜以  
筵篋度之宮徵何哉在座知是舊人杜牧登筵驚其故態

紅粧薄命祗寓其飄零花月之傷錦瑟芳詞亦寫其潦倒  
風塵之色旣已鍾情於蘓州刺史因之屬序於陽羨書生  
僕也粉染玄英亦有靡蕪之約香煎蘭葉殊愆萱薏之期  
心如蠟淚徹夜長流情擬蠶絲終朝不竭贈陳王之枕已  
悞今生窺賈午之牆還思再世痛踰死別何煩方士之少  
君哀甚和親莫怨畫圖之延壽庶幾墳名紫玉永依幼女  
之釵酒伴青娥尚感步兵之哭冀君彤管寫我香奩

曹實庵咏物詞序

霜凋魏帳月中之剩瓦何多水咽秦關地上之殘城不少  
天若有情天寧不老石如無恨石豈能言銅駝轂鯁恒逢  
秋至以偏啼銀雁簷沙慣遇天陰而必出山當雨後易結  
修眉竹到江邊都斑細眼溯夫皇始以來代有不平之事  
千年關塞來往精靈萬古河山憑陵鬼物縱復人稱恨甚  
事奈愁何江淹工愀愴之辭鮑照擅蒼涼之賦正恐世閱  
世以成川年復年而作谷捧黎陽之土堙此何窮積函谷  
之泥封來不盡然而劍鋒盡缺總爲旁觀壺口新殘只因  
細故青史則幾番劉項誠然於我何堪黃河則滿地袁曹  
遑曰干卿奚事或蝦蟆陵上暮年紅袖所閒談或鸛雀樓  
邊故老白頭之夜話或武擔過客曾看石鏡於成都或盤



屋居民偶得銅盤於渭水苟非目擊卽屬親聞事皆磊砢  
以魁竒興自顛狂而感激槌床絕叫蛟螭天矯於胸中踞  
案橫書蝌蚪盤旋於腕下誰能鬱鬱長束縛於七言四韻  
之間對此茫茫姑放浪於減字偷聲之下吟成十首事足  
千秋趙明誠金石之錄遜此華文郭弘農山海之篇慚斯  
麗製嗚呼烟霾天水囂宮旣蔓草千堆浪打章門灌廟亦  
殘陽一片悲哉季札劍影徒青逝矣劉郎奩痕尚紫銀槎  
泛斗難追博望之勲名彩筆凌雲空羨馬卿之詞賦何況  
長平繡鏃恨血全紅大食冰菟愁雲半黑織成魚素粘海  
氣以猶醒掣得龍髯鼓天風而倍怒豈非喜喜出出諾臯  
之所未收怪怪竒竒齊諧之所不載者哉僕每怪夫時人  
詞則呵爲小道倘非傑作疇雪斯言以彼流連小物之懷

無非淘洗前朝之恨人言燕市實悲歌慷慨之場我識曹  
君是文采風流之裔狂歌庭沓聊憑鳳紙以填來老興淋  
漓亟命鸞笙爲譜去

錢寶汾詞序

五陵烟月最說長安三輔笙簫尤推鄠杜縣名蓋屋樓前  
多織錦之妻殿是馭娑闕下有橫鞭之客於是貂蟬年少  
金粉仙郎衛叔寶之體不勝綺羅王夷甫之手詎離珠玉  
時則柳衣染綠荔帶垂青鳴箏而過公主之園挾瑟而上  
將軍之第臺前放仗見南苑之參差閣下傳餐望西山之  
葱鬱李嶠爲秋雁之吟王維有紅豆之作寫之玳瑁知才  
子之多情譜以箜篌驗佳人之巧笑然而蛾眉善怨時懷  
故里之鶯花蟬鬢工啼恒憶微時之娣姒雲中射雁偏愴  
晨風苑後釣魚常悲流水絕憶嵇康之鍛慣思張翰之鱸  
是則柳郎中小令麗句雖多牛給事新聲愁端不少者矣  
僕類楚狂偶來燕市一聲河滿憐司馬之青衫三疊陽關

羨尚書之紅杏不揣題詞之贈矧當判袂之時逐秋風而  
竟去余是愁人望明月以相思君真健者

觀槿堂詞集序

將使三辰不黷二氣無訛鳴條破塊不聞淳悶之年木穰  
金饑罕紀睢于之世賁桴土鼓騰臘而咏函詩折俎烝穀  
頰聘而賡雅頌固已五常之性共澤和平寧惟四始之遺  
獨歸敦厚卽或越客關弓塞翁失馬爨僅比於蚍蜉忿祗  
緣夫睚眦非無染指之嫌未免掇灰之懼假以飲我言求  
蠲疾之蠱迨其謂之姑酌忘憂之酒無如鬼旣善謀天而  
多醉石能言於晉國鶴解語夫堯年蒼鵝出地剪鶉首而  
何堪青犢彌天攀龍胡而莫逮此則霧擁張超之市有識  
咸悲濤飛徐福之船含靈共閔雖復弦高賤賈微虎小臣  
汪錡不過孱童漆室止於弱女亦或銜酸茹苦坐獻行謠  
縱使石傾武擔厘壘愁城假令土捧黎陽難填恨谷況復

日下貂蟬天邊蘭綺地名殺初表連繡嶺之堤縣是偃師  
直對金墉之樹徹侯外戚既平時爾汝之交長樂甘泉亦  
疇昔經過之地他若五陵大俠三輔諸豪東京趙李之家  
西漢金張之族南渠北澗盡丐澤於銀潢東壁西隣競分  
光於碧落橐筆鳴珂之地卽是枌榆炊金饌玉之賓咸聯  
肺附旣已哂南朝之江鮑抑將邁北地之溫邢而乃識起  
狐祥妖徵蛾賊尋三川之失守洵五帥之難歸田單闔族  
載鐵籠而宵奔廋冰子身橫荻船而潛渡悲歌慷慨之士  
感激何窮烏頭馬角之言沉吟奚極且夫霍博陸旣驃騎  
之兄班定遠實蘭臺之第一則兵欄武庫奠鰲足於人間  
一則芝檢銀函作龍頭於天上兩環耀日雙劍凌雲而今  
則瞻里兄兮九原人去所思伯也八陣圖空江流不轉烟

霾葛相之營日瘦無光天壓祁連之冢風車雲馬時聞褒  
鄂之弓刀牧笛樵歌不見滕公之寢室遂使舊時牙將半  
隨老嫗以吹篴每令賢弟黃冠私雜羣僮而絮酒於焉曰  
怨怨何如乎以此言悲悲可知矣於是歌則不能泣仍不  
可念欲著金陀之史姑俟諸地老而天荒無如填蘭畹之  
詞猶藉以娛年而送日爰乃借雷輓電書之聲寫劍拔弩  
張之氣或跌蕩於舞女雙鬟之隊揮毫而竹肉奮飛或憑  
弔夫將軍百戰之塲入破而關河劈裂蒲牢乍吼九邊之  
馬俱瘖千鎊一揮萬將之頭畢白幽可匹夫莊騷細不遺  
夫蟲豸臧文仲書詞詰屈譏語居多鐘儀父音節蒼涼土  
風不少觀其見事生風倚聲橫筆鎖蛟螭於腕下鱗甲之  
而落蝌蚪於行間風雷發作百靈穿鑿擬部鼎而逾斑萬

怪槎牙較商盤而更駭旁人不識謂多郭公之缺文神瞽  
何知云是子雲之奇字嗟乎秦時毛女漢室銅仙聲作龍  
吟淚如鉛水紅綃滿眼已憐殘拍之無多鈿笛三聲竊喜  
舊人之尚在水天閒話先生每提燕筑而來花月新聞賤  
子亦挾吳簫而至岑牟單絞僕尚能捉搦從公腰鼓箏琶  
客幸勿併優畜我

黃編修庭表宮詞序

武擔山下卽爲望妃之樓袂裊城邊便是宜君之縣祖中  
湔上灌壘居多鄴下枋頭叢祠不少雲昏張掖沮渠蒙遜  
之都草冷蘭州禿髮烏孤之地霸臺突兀繡瓦猶存聖井  
疎蕪銀床斯在然而多成往蹟半屬前塵是皆然矣無庸  
俟來者以申哀何代無之詎必向前賢而獻吊至夫千門  
萬戶專稱漢主離宮暮雨朝雲祇目荆王別館臙脂縱麗  
無非北地之花孔雀雖妍不過南方之鳥而乃濫相擗摻  
恣用編排越艷爲吳娥而製恨總涉虛無嬴姬假趙姊以  
言情差無事實徒克漫錄僅助叢談難云作賦之才未見  
著書之益則有運逢典午身本吳人官在黃初生於漢季  
曾作彼都人士大有流傳親爲勝國衣冠能無記憶加之

珠囊紐散尚賸遺民玉璽函沉還餘故老蜀人楊得意夙  
直漢庭鑿者夏無且精知秦事西風江上有人善濕青衫  
南國花前此客解歌紅豆舊時阿監暮年恰值湖湘昔日  
宮娥寒夜偏談天寶開蛾撲蝶輦下新聞消九咬春官家  
瑣事何況東京坊陌未乏成書南部笙簫相沿故典三聲  
玉樹偶譜自摒擋線篋之餘一卷金縷半搜於狼籍牙郎  
之手溝邊暗立記來烟月千門牆外潛行偷得琵琶一段  
天如有恨月豈常圓海若多愁石應早爛薊子訓撫銅仙  
而嘆息亶其然乎魏東阿睹玉枕以悲哀良有以也猗歟  
江夏最擅才情變彼宮詞尤推綺麗以我同官之雅矧爾  
齊年遂於校史之餘屬之撰序從來雅頌義仍取乎春秋  
自昔編摩事未妨夫吟弄范蔚宗后妃傳竟綴此數章班

孟堅外戚篇成附茲一卷以彼意匠清新詞條雅暢屈原  
忠愛聊寄興於處妃玉女之間陶令清高姑託言夫翠簾  
鴛儔之事豈比中唐王建競新聲於大曆年間寧同花蕊  
夫人結妍唱於摩訶池上嗟乎人孰無情古皆有此野狐  
落千春金椀齊化鴛鴦內人斜萬載羅裙都成蝴蝶

米紫來始存詞集序

臺餘此地最善悲歌船憶君家能裝書畫研山齋內米顛  
旣一字阿章嘉陵圖中元暉復小名虎子紛披粉墨本自  
門風蕭灑才情實緣家學蓋在昔而已然顧於今而益信  
則有花封仙縣畫省望郎筆陣摩空文瀾倒峽蛇能蟠笥  
傳家則代產達人蛟欲生毫墮地而羣呼才子旋登上第  
歷尹名邦弱齡釋褐桃憎紅綬之光早歲牽絲草妬青袍  
之色爾其賦軼鄒枚文兼崔蔡濯龍賜第二曲則坊在天  
邊夢鳥摘箋千賦則價高日下馳聲河北温子昇遣此生  
慚流譽江東王文度聞而竊嘆酷嗜臨摹尤精皴染蕭思  
話書評第一虎跳龍拏曹不興畫苑無雙鳥啼花笑鵲綾  
捧去揮殘萬軸之菖蒲麝粉調來榻出滿園之蛺蝶分斯

一藝儘足飛騰借彼餘波尚然綺麗更耽協律旁及倚聲  
斜行紅蠶託興於銀箏檀板之間袞拍金蟬寄傲於酒肆  
倡樓之內三千錦瑟旣擅柔情丈八銅琶兼饒逸氣嚴霜  
砭骨非無望古之篇皓月煎腸不少臨風之作若夫三秋  
捧檄道出鄱陽千里之官途經易水黃皮縛袴斜壓赫連  
之刀赤兎揮鞭直突慕容之壘飄零繡瓦問分香吉利其  
何歸牢落黃金弔擊筑漸離之安在以至天低彭蠡濤沫  
濺銀地圻碣礫土花暈紫匡廬山下醜樽酒以橫江繻葛  
城頭會官僚而出獵亦復嘆喟而歌憑陵而語一聲蠻鼓  
黃雲脫壞而羣飛幾疊邊笳白雁徊徨而竟下長篇間作  
小令居多井華汲處盡唱屯田員外之詞柳絮開時都吟  
長慶才人之製然而畧有遺亡曾無愛惜墨痕半濕不知

汚誰氏之裙字蹟纔乾未省上何人之帕抄來北里半被

塵埋錄向東家還虞簡脫堆作叢編好事者爲之搜叢棄  
爲長物知音者代以流傳今之始存其大概也記與高門  
久諧夙好同是楊袁之苗裔僕不如人俱爲顧陸之子孫

君能念我溯百年之喬木譜牒猶新意三世之芳蘭游從

如昨敝廬硯北還標北海之署書舊業樊南尚寶南宮之

尺牘余大父少保公與君大父太僕公爲同年最契寒家  
聯扁多大僕署書其先世往來尺牘迄今猶在四弟

子萬篋中幸重逢於燕市獲相和以楚歌雖太僕亭臺已無夜

火勺園泉石久歇春機米家燈當時最擅名太僕曾以而  
端綺贈先大父上織勺園奇石

稜稜犀角知來者之多賢縵縵龍文識曩修之克紹祇慚

賤子有愧前人屬題一卷之新詞并話兩家之舊事君真

詞癖已獨步於花間蘭畹之中僕亦酒狂願相從於減字



莊澹菴先生長安春詞序

遲遲春日青陽總四序之先藹藹長安紫葢會五都之極  
宮開閭闔夙擅神臯節屆勾芒還饒淑氣惟天時地利之  
交榮故短什長謠之競叶王勃著春思之賦歲在咸亨二  
年徐陵成春興之篇時則洛陽三月則有柄指東皇晷窮  
北陸頻捲蝦鬚之帳爲放冬歸漫圍龜甲之屏須令臘去  
裁紅暈碧春已到於幡邊滴粉槎酥花漸盈於勝裏織錦  
坊南之路鳳子先知吹簫巷北之街蛾兒早覺浮浮新霽  
訝殘雪之旋融曖曖微薰笑輕冰之乍釋檻前晝煥已春  
鳥之能歌鏡裏年芳更春人之似織加以從來燕子只舞  
昭陽自昔蘼蕪偏叢長信彼春日固穠華之候況長安尤  
佳冶之鄉九華殿上鳥必雙棲百子池頭花非一色參差

裙幄糊蘋壤以纓崖庵靄球堂嵌萃棖而擢谷翻其綿羽  
行行逢叔寶之車鷺彼圓吭處處遇安仁之彈小侯玳戟  
外戚珠駢妖童挾瑟於觀津蕩婦數錢於新市何必爲歡  
百計方邀息媯之片言詎須行樂千端始博賈妻之一笈  
無煩護草便已忘憂靡假靈犀居然蠲忿豈比夫崔駟不  
樂吳質工愁蓬門鮮長樂之花樵徑乏駢柯之樹田園寥  
落難尋鬪鴨之欄姓氏單寒疇隸飛龍之籍名不挂於春  
官世其強爲秋士者乎於是蘭臺貴客芸閣華卿鶴禁多  
閑灑南朝之金粉鸞坡偶暇譜北地之胭脂臃臃甲柝姿  
肖物以屢遷貽宕芊綿體緣情而善變二十四番之花信  
無勞花葦新聲一百廿闋之春詞自有春坊麗製播之後  
代謾誇崔珏鴛鴦詢彼前身仍是莊周蝴蝶

徐竹逸詞序

竹逸徐先生犀角名家駒王貴裔弱齡淹博能撰岫嶼之  
碑綺歲通華卽辨琅琊之稻徐孝穆文成百軸龍鱗魚油  
顏延之詩擅五言鏤金錯彩少食貧而種學北郭騷譽滿  
人間壯委贄以從王東方朔名高殿上一官繫組則武侯  
流馬之鄉萬里牽絲亦新息跼鳶之地句町表連白國五  
溪開莊躡雄關樸榆旁綰牂牁九睽奉唐蒙一詔蠻花樹  
樹紅棉燒爨女之釵犵鳥村村鸚鵡勸熨僮之酒先生則  
叱馭開邊褰帷聽事程經洱海馳驅於冉駹邛笮之間路  
出昆明鞅掌於樓櫓戈船之下竇蒙火毳都成月露之形  
渝舞狼歌齊叶風雲之調固已碧雞主簿玩此清文白馬  
氏羗訝其麗製竹王古廟繚牆砌夜月之吟花面諸黎縑

怕繡春燈之句然而一上點蒼頓溪鄉思屢聽杜宇彌減  
宦情小人有母難忘考叔之言行路多岐偏下楊朱之泣  
誓拂衣而終老遂散髮以言旋於是宅枕銅官潭臨玉女  
陶淵明之門外垂柳五株盧照隣之堦前病梨一樹蓬蒿  
幾尺儼然三徑元卿雜果千頭何異小園庾信隱夫答選  
園有隙而皆紅平仲君遷隣無扉而不綠先生既散誕琴  
書之側復優游巖岫之旁客到開軒朋來刻燭花前挈榼  
半南山賣藥之翁樹下提壺多北海修琴之叟纔開芍藥  
邀側帽以來觀甫釣鱗鮐命解衣而對食雞豚芋栗極歲  
時暇豫之懽燈火桑麻盡里社團圓之樂若乃鄧尉梅花  
錢塘桂子三春日煖聽南國之鷓鴣八月秋晴看西山之  
麋鹿筆床茶竈依山崦以爲家梵磬漁筒睽烟波而結友

浮家泛宅醒噩夢於滄浪醉月迷花叙前游於杯酒莫不  
詞寫金荃句同錦瑟三千粉黛掩周柳之香柔丈八琵琶  
駕辛蕪之感激詎若牛家給事行間描楊柳之花寧徒張  
氏郎中字裏寫鞦韆之影愧僕不才託君末契展量花雨  
時陪鈴索之遊詩畫旗亭每預箏琶之讌嗟乎西鄂文人  
從來失路餘姚書記大抵無家君也坐愁行歎恒傷廉吏  
之難爲僕兮望遠登高常恨古人之不見張一軍於酒裙  
歌扇之上誰得臣狂問六代於殘陽暮靄之餘詎干卿事  
聊題儷句用譜新聲

蒼梧詞序

若使人間罷長恨之歌天上少銷覓之曲井公多暇惟解  
投壺彭老無愁未嘗觀井則秦佐不彈燕歌遂歇石何言  
於晉國鶴無語於堯年無如海水長乾蓬池易淺趙廁有  
不平之客吳關多可惜之人此則大夫思告其哀匹士願  
歌其事言之不足悲矣如何且夫鳩豈善於爲媒魚寧可  
以作媵子虛亡是詎常真有其人暮雨朝雲要亦絕無之  
事然而宋玉以寄其形容相如以成其比興固知情難撫  
實事比鏤塵託讒謎以言愁借譎詼以寫志凡茲抹月批  
風之作悉類詛神罵鬼之章達者喻之空花愚夫求之楮  
葉今有參龍華胄綉虎雄才名已動於春官身甫偕夫計  
吏而楚國亡猿塞翁失馬叩丹青而無路攀紫闥以誰階

泣不成聲逝將安適時則四海誰容三年不笑西遊蓋屋  
 聽雞渡函谷之關東返轅轅立馬望咸陽之坂北風拉沓  
 高臺颯其無人南內荒涼夜烏咽而相語此皆扶荔遺基  
 長楊廢館金戈夜響則羣雄蹴踏之鄉鐵壘晨摩則悍帥  
 奮揚之地漢高皇大風置酒起舞悲來唐玄宗夜雨聞鈴  
 沾襟淚下既美人駿馬之安在亦故宮陳跡之極多於是  
 萬感風生千端蝟集蘸杯槃而在噉墨欲成龍濡頭髮以  
 作書字皆成蚪每於鐘鳴燈熄之餘恒作劍拔弩張之勢  
 在時漫寫定屬神來醒後詳觀不知誰作又或挂玉筵前  
 絕纓會上一雙紅綬見隔巷之新人半夜青衫遇下江之  
 故伎夢華小錄彷彿前生花月新聞依稀故事亦復曲付  
 何哉調翻穆護安公子閒歌一曲小秦王高唱三章金柔

玉輻青娥閒譜其聲情斗轉參橫白髮暗傳其點拍信陵  
 君醇酒婦人而外他何知乎盧思道白擲劇飲之風君其  
 是矣僕也老而失學雅好填詞壯不如人僅專顧曲慨自  
 鄒許董友既亡之後淚滿蟬鈿况復曹顧王樵久別以來  
 心灰兔管見吾友之一編動鄙人之三歎啼成紺碧不讓  
 江潭紅豆之思泣化瓊瑰何殊風雨蒼梧之恨永傳樂府  
 長播詞林

浙西六家詞序

錦衣倉北六朝之山色千堆粟騎桁南萬古之江流一幅  
獅兒去後大有新亭燕子飛時還存空巷則有彩毫公子  
粉署郎官續漢上之題襟效機中之織錦衙香熏罷只願  
箋愁椽燭燒餘惟圖製恨玉玲瓏小閣滴粉槎酥紅茵蒼  
山莊啼花怨鳥更值公叔華宗相君貴胄常棲蓮幕別署  
竹垞杜紫微掌書記之日艷體偏多韓君平知制誥之年  
宮詞不少醉臥鳳凰橋上曾翻十院琵琶狂遊雞鹿塞邊  
慣聽一軍箠策書之粉壁譜在羅裙況復柘湖旣咸籍同  
居秋錦亦機雲不別其說隴西才地有謫皆仙俱誇家令  
門風無腰不瘦金戟則臨風對拓感激沉雄玉笙則帶月  
交吹淋漓頓挫焚僮破悶訴萬里之飄零燕女尋歡序十

年之淪落溺人必笑姑流浪於酒旗戲鼓之間亡子思歸  
長嘯喑於殘月曉風之下疇能意我定邁知音假曰華予  
寧無好事於是拈來犀管匣用琉璃劈得蠻箋裝成玳瑁  
地則錢塘携李家山只兩郡之間詞如白石梅溪風格軼  
羣賢而上釐爲一卷約有六家從此并華汲處都吟柳永  
之章自今紈帕貽來半織元稹之曲屬有陳琳寄言龔遂  
僕也紅牙顧誤雅自託於伶官綉幔填詞長見呵於禪客  
銅官玉女邑居不百里而遙小令長謠卷帙實千篇有羨  
倘僅專言浙右諸公固是無雙如其旁及江東作者何妨  
有七聊資諧噓幸恕清狂。

王良輔百首宮詞序

三千窈窕競進丁年二八媚姪俱陪甲帳巫山西眺荆臺  
饒行雨之人漳水東流魏殿盛分香之客九天春曉傳妙  
曲於才人三閣花明艷新粧於學士官名長樂人號小憐  
爾乃年年竊藥只恨蟾孤夜夜吹簫惟愁鳳杳瓊樓玉宇  
稔高處以偏寒水井銅鋪較外邊而倍冷莫不結眉表色  
破粉成痕衛莊姜多太息之言陳皇后有不平之曲且夫  
丹闈晝寂並若雲霄紫禁晨嚴非同閭巷問樹名於温室  
詎必全知記曲疊於霓裳將毋小誤縱復含情渲染極意  
賡揚侈仙家之亭館總涉描摩誇海上之樓臺終無事實  
然而白頭宮女能說開元隔水商船善談江左或緣自佩  
蘭之誦述或得諸樊嫵所流傳西京雜事譜在琵琶南部

新書弄之篋衍則有主文諷諫者綴以吟謠驗往察來者  
形之比興語皆寄託夙工宋王之微詞事屬虛無不繫劉  
楨之平視貞夫抱慙無非自擬其騷愁誼士懷芳寧至或  
傷於怨誹於今爲烈自古而然三韓王元輔先生七葉金  
貂一門繡戟蒲桃滿幅空北地之胭脂翡翠聯箱洗南都  
之金粉人居洛浦慣解吹笙家在扶風原精織錦此千篇  
嗣出將懸市上之華文而一卷先傳早播宮中之雅製也  
緬昔陝州司馬仲初標綺麗之稱孟蜀夫人花蕊擅清新  
之譽以暨李珣之小妹亦留百首之宮詞何意吾賢獲符  
往詰後有人焉聆斯曲也悠揚擘緩疑聞百轉之鶯啼感  
慨沉雄似聽千年之鶴語

葉桐初詞序

門邊蕙葉葉盡生花車裏璧人人皆有集則有齒踰終賈  
文邁班張黃童旣門第無雙謝客復詩名第一而乃丁年  
孤露丙舍凋殘少依舅宅魏舒實甯氏之甥長贅婦家樂  
廣以衛郎爲婿雞籠山下新移坦腹之床鴛水湖頭舊築  
涓陽之館緯蕭託業少賤奚堪采椽爲生長貧不免然且  
桐號孤生還思向日藥名獨活只欲搖風千篇繡虎揮完  
河北之箋五夜雕龍擘盡膠東之紙月明益浦非無醜酒  
之篇花落臺城亦有隔江之曲風中弄笛吟九派之銀鬪  
山半調笙舞一天之彩鳳固已聲華籍甚才調斐然者矣  
憶僕年時逢君客裏鮑昭城在臨河則面面朱欄蕭統樓  
存夾巷則家家瓊樹加以陶士行政之官北上王茂弘適



盡室南來

余昔與桐初作客廣陵正值合肥龔夫子以大司馬還朝

千官祖餞舸舫彌

津百里追陪衣冠滿座與君此日頗多嬉笑之言顧我何人亦有激昂之作別幾何時歡真不再詎意風寒易水重遘荆軻何圖草蔓燕臺忽逢樂毅遂班荆而叙舊爰敷衽以論心示我以詞命爲之序嗟乎曾聞長者呵蘭畹爲外篇大有時賢叱花間爲小技十年艷製坐收輕薄之名一卷新詞橫受俳優之目人譏周勃僅解吹簫世笑禰衡惟工撾鼓噬臍莫及捫舌難追乃猶憊不更絃老偏見獵恣情標榜何能增才子之名竭力賡揚祇恐益小人之過然而結習寧忘鄙懷有在遇成連於海上情終以此而移見美麗於中山口遂不能無道云爾

金天石吳日千二子詞稿序

嘗考夫聲音之道自有淵源詞賦之宗遙爲汎濫白鳩黃督曲調以短斷爲工子夜莫愁節奏以敏諧稱聖是知齊梁之樂府卽唐宋之倚聲也自名花傾國供奉擅俊逸之才金縷提鞋後主秉綺羅之質教坊簾幙試艷曲於清狂平樂樓臺弄新聲於輕薄詞有千家業歸二李斯則綺袖之崑門紅牙之哲匠矣若易安之婉變清新屯田之溫柔倩媚雖爲風雅之罪人實則閨房之作者由斯以降我無譏焉嗟夫北怨馬嵬空留羅襪南悲鳳闕不見秦樓聲聲玉樹終傷南國之翫步步金蓮長下東昏之淚相逢家令猶有內人閑說玄宗豈無宮女三千小妾思唱李花二八妖童誰餐桃子哀傷奚極悱惻何言况復紫塞琵琶盡是

帝城之蕩婦黃沙感策都爲朱邱之名姬笙上金蛾半翻  
囿紇弦前火鳳別譜龜茲於是抱捍撥而私彈撫箏篋而  
暗搵岐王宅裏豈知北地之歌胡后宮中不類南朝之曲  
時則有家居盤屋幼富才情縣近金陵長憐歌舞自誇善  
曲不事金吾慣倚能仙思調玉女遂迺巧製珊瑚之扇初  
成琥珀之床流蘓以綵縷爲絲壓角以明珠作押被之小  
令度以名倡五侯馳才子之名七貴虛上賓之席吹簫夜  
出挾瑟晨歸洵可以矜天上之弄臣廢人間之宮體矣爰  
命狂夫起而爲序卸輕紅之衫子親展銀箏擲雜綵之幃  
頭坐移寶柱須知天涯落魄無非傅粉之人地角流連總  
屬熏香之客爾

閻牛叟買花詞序

牛叟向有悼亡之戚曾爲賦兌閣遺徵詞十首今  
新納小姬同人贈句顏以貫花仍爲製叙

昔言新婦宜配參軍其說傾城足當名士唐家白傅圍留  
楊柳纖腰宋室坡公坐擁雲藍小袖咸哀窈窕並縱清狂  
雖老去而恒然在詩人爲尤甚適邁渦河之遠使郵來淮  
上之新聞云有蛾眉歸於牛叟時則南朝親懿北府朋游  
爭裁却扇之詞競製催粧之曲文成綺密述才子之鍾情  
旨託清新叙狂奴之故態縱易言生稊而未可深嘲况詩  
美天桃而能無遙妬獨是七載恒鰥終年獨宿盆纔罷鼓  
尚餘愀愴之思簫已重吹忽作柔靡之想何來曼倩頻娶  
小妻豈有安仁頓忘大婦常情爲之揣度俗士加以然疑

不知思纏故劍所貴明其本懷詎篤遺簪尤在全其初志  
若使一乖伉儷之歡長隔房帷之愛則是斷謝公之綠竹  
觸景蒼涼遣陶令之琴樽暮年蕭瑟牙籤粉軸疇事校讐  
茗椀笛床誰爲總管徒增逝者之悲轉掩前人之德何況  
含弘雅量昔已賡膠木於生前誰云婉變深恩不願接桃  
根於沒後此泥雖粘絮原非太上之忘情而蚌必生珠堪  
作詞場之嘉話也斯語未終先生曰善貫花輯罷敢重祈  
元晏之篇兌閣吟餘慎莫厭發棠之請

蔣京少梧月詞序

銅官崎麗將軍射虎之鄉玉女崢泓才子雕龍之藪城邊  
水榭蹟擅樊川郭外釣臺名標任昉雖溝塍蕪沒難詢坡  
老之田而隴樹蒼茫尚誌方圓之墓一城菱舫吹來水調  
歌頭十里茶山行去祝英臺近鵝笙象板戶習倚聲苔網  
花牋家精協律居斯地也大有人焉僕也十年作賦愧遜  
陳琳三徑論交欣逢蔣詡其人也九侯第宅四姓衣冠家  
風通顯東京蕭育之家門第清華北魏崔陵之宅夫其幼  
敏才情早耽經史行間芍藥盈箱潘岳之花字裏葡萄滿  
篋丘遲之錦王恭逸態濯楊柳於月中謝眺清文爛芙蓉  
於日下文兼各體傳鶉觚博奧之宗詩備諸家劉越石清  
剛之選而乃名同小宋妙解音聲系出竹山尤工樂府於

是温家助教紅蠟填詞薛氏侍郎銀箏製曲阿灰善怨不  
乏畫簾微雨之吟花葢工愁相傳馬上鶻聲之作櫻桃隔  
葉時遇順郎簫鼓逢場還迎車子年年麗製浣北里之羅  
裙夜夜香詞灑東隣之粉壁葢摸魚戀蝶卽是黃華赤雁  
之遺音而六醜三臺依然白紵紅鹽之換調審其格律直  
追屈宋風騷揆厥源流詎雜金元爨舞且也黃香純孝屢  
歲從親庾信多才頻年去國大江西上長空之樓櫓何多  
烏鵲南飛獨夜之關山不少琵琶亭下三更逢商婦之船  
章貢門前千里斷降王之信霜纏繡鼓依稀陶侃之空營  
兩洗珠鈿髻鬢灌嬰之賸瓦遙攀九疊羨匡續之成仙極  
眺雙孤笑彭郎之未嫁躊躕已甚曠恨何言無何而滄浦  
迴颿仍過豐浦尋陽悵怳復上衡陽銀龍珠沫使元規開

府之鄉白月青天甘興霸橫戈之地檣飛湖口一片神鴉  
席挂湘中數聲山鷓楚天染黛只想成烟巫嶺啣丹還思  
行雨細腰宮內問羅綺以何年墮淚碑前悵繁華之不見  
黃蘆苦竹偏傷羈客之心碧杜紅蘭例入騷人之咏時則  
竹枝乍唱已付船娘囉噴纔歌便填瑟部接毫以賦題名  
赤帝之宮擁檝而吟託興黃陵之廟况復飄飄短鋏再陟  
金臺落落單衫重闕石鼓野鷹臺迥恒邀朔客以呼盧墮  
馬粧妍聯過燕姬而貰酒嗟乎霜零碣石樹何葉以非黃  
日匿漁陽山無峯而不紫霓裳拍散人間無擬笛之賓穆  
護歌殘天上少吹笙之侶乃李暮江上尚剩遺宮而賀老  
筵前還留舊本遂移商而刻羽約有千篇爰滴粉以搓酥  
釐爲一卷綿駒善唱要爲自詠其生平阿鵲成歌祇以代

陳其辛苦如傳紫塞龍城繡李益之詞儻搢紅樓鳳紙寫  
韓翃之句

吳初明雪蓬詞序

青天恨滿天邊無不死之仙碧海愁多海上少長圓之月  
儻若梅根治畔宮闕常新竹格斫邊市廛如故北府之精  
兵未散南朝之狎客不來則彼都士女卽逢枯樹以奚悲  
僑寓衣冠便遇新蒲而不恨瑤壇可以剗掃愁之竹番舶  
不必誇蠲忿之犀無如蕭蕭落葉只打空城滾滾長江偏  
圍故國隔巷值跨坊之馬大有新官夾江停下水之船非  
無故伎比來何濶只歌玉樹之花生世不諧乃佳金陵之  
縣此則衛叔寶渡江之歲定爾傷神周伯仁藉卉之時斷  
然流涕者矣然而誼夫纒纒縱復情鍾達士消搖還能理  
遣但使室廬畧定井竈粗安馮敬通之跌宕尚對孺人東  
方朔之詼諧恒携少婦蘭成膝下長袍荀娘陶令門中惟

娛通子則睠西洲之斷港於我何求訪南內之遺基千卿  
甚事或者臺城花草最耐興亡建業河山惟知歌舞亦可  
推黍離爲膜外置麥秀以旁觀東陵瓜熟雖頗頷以何妨  
下漢田成縱栖遲而亦得而乃飄飄社燕慣欲依人瑟瑟  
神鴉惟思餞客一辭牛渚頻爲西塞之遊再上嶼磯每有  
南荒之役楚天似墨仍然腸斷之邦湘草如羅依舊魂銷  
之地意者巴陵銜怨更甚鍾陵沔水無情還同江水也乎  
於是臺城吊古譜以銀箏漢口懷鄉寫之檀板別業結李  
皇城畔小令南唐片帆疊庾亮樓頭清言西晉雪雰雰以  
漸下蓬颯颯以驚飛觀乎止矣斯真吳札之後人和者誰  
歟只仗杜陵之野老

謂茶村先生也

楊聖期竹西詞序

伯起門風競說通明第一盈川才地羣推華妙無雙楊梅  
對客代產文人黃雀投環世傳陰德則有罽袍公子斑管  
王孫雕龍髻髻之年綉虎綺紈之歲乃者生偏遇亂幼便  
依人南池驛畔舊隣太白之樓蘭陵縣前新築渭陽之館  
雲橫魯甸瞻望兄兮誰來月冷吳關思悲翁而不見他鄉  
疇恤幾成王粲離家故國難歸畧比楊朱失路備辭人之  
辛苦極才士之牢愁然而性本清狂人尤放誕樓頭扇底  
頗多託興之篇花下尊前大有言情之製於是北里胭脂  
人人繕寫南朝金粉字字流傳菖蒲艷曲爭譜自銀箏檀  
板之間芍藥新聲徧織於舞帕歌裙之上詎云小道亦曰  
多能昔者余鄉猗歟我友書裝玳瑁鄒陽則集號麗農筆

架珊瑚董相則詞名蓉渡誰家花月不歌李嶠之章何處  
池臺不唱元微之曲自二子之云亡遂百端之交集何意  
荒州重借驚才於異地遂令賤子復聆妙響於餘生喜不  
自勝起而相和今夜月明薊北不逢臺上之黃金他時花  
落江南幸唱筵前之紅豆

吳曹三子疊韻詞序

布帽彈箏燕市有歲寒之集貂裘換酒吳天來疊韻之吟  
訝兩地之同心喜一緘之遠到鼠鬚描罷數行紅豆新聲  
魚腹藏來半幅金荃麗句頓令笑口亟趨花開須付歌喉  
還隨蝶拍夫其飛揚跋扈頓挫淋漓旁行側出韻數見以  
彌鮮鑿孔絕幽押雖重而詎復石崇王愷競賽珊瑚虢國  
秦姨爭誇金翠宜僚累十二而丸不墮實寓於虛庖丁更  
十九而刃若新技歸於道寸人豆馬不足稱竒楮葉棘猴  
何能鬪巧沉吟不置賞玩實多乃於開卷之餘歛覩見懷  
之作僕也三年委贄莫逢休沐之期千里懷鄉長負耦耕  
之約年年濠上只想觀魚日日街頭偏逢騎馬幸故人之  
見憶雖遠道以相憐煩謝吳均并詢曹植感卿愛我願毋

忘息壤之盟惟爾知予須一寄當歸之藥

今詞選序

原夫鐘鳴谷應截嶰竹以雄雌暈滿灰飛絙桑絃於子母  
算窮升禽氣可感乎八風律準陰陽根實生夫萬事八公  
詠桂韻同小海之簫四皓歌芝聲類始青之曲此則識在  
參寥理由象罔橋陵杳矣挾伶倫以俱仙蒼梧邈焉騰后  
夔而不見宗邦乏播鼗之叟列國無觀樂之賓自古爲難  
於今不再至若齊王殿內吹竽者三千孔子壇前鳴絃者  
十九秦太史之書東瑟趙將軍之請西缶以及謳稱王豹  
化被河西洎乎歌數綿駒風行齊右莫不性由習染俗以  
人移此之音調大畧可觀矣蓋詩自皇娥而下詞沿趙宋  
而前歷代相仍變本加厲其間因革可得而言七絕平韵  
卽名爲小秦王七絕仄韻遂命爲雞叫子瑞鷓鴣便是七



言近體生查子不過五古遺聲以至三字九字在樂府已引其端及夫桺枝竹枝彼唐人夙嫻其體考其祖禰俱爲騷雅之華胄咀其雋永絕非典謨之剩馥也夫體製靡乖故性情不異絃分燥濕關乎風土之剛柔薪是焦勞無怪聲音之辛苦譬之詩體高岑韓杜已分奇正之兩家至若詞場辛陸周秦詎必疾徐之一致要其不窳而不梏仍是

有倫而有脊終難左袒畧可參觀僕本恨人詞非小道遂撮名章於一卷用存雅調於千年諸家旣異曲同工總製亦造車合轍聊存微尚詎偁前型嗟夫生才實難審音不易形不盡於麟閣徒作葉公之龍姓未挂於鳳洲將成荀息之馬聊日中而秉籠將道上以吹箎豈曰公真醉矣是醒而狂庶幾國有人焉倡予和女

歲寒詞小序

斗室恒關雙扉久堽餉香豆輒正當祀竈之辰釀熟雞肥恰值消寒之會三年執戟急景匆匆五夜讎書浮踪落落悵門丞之欲去餞以瓶盆冀如願之能來迎之蕢燭端居不樂僵卧常愁乃有綉虎才人乘羊猶子雙拈玳管倚小令以分吟並劈苔牋向長宵而覩寫傳諸好事日以詞豪播在通都資爲談助屬鄙人之技癢更我友之神來和有數家鈇成一集嗟乎上陽宮外雪大如鴉宣曲觀前風饕似弩山頭凍雀覆鶴毳以難温砌下寒蟲藉貂褕而詎煖何來數子只欲雕冰頗怪羣賢偏工鏤雪定屬無聊之事心知不急之人弄之篋衍且克壓歲之錢覆彼瓶盆姑貯辭年之酒

胡二齋擬古樂府序

文章政事人少兼科循吏儒林史無同傳栽花仙縣非關  
筆底之花製錦名邦詎繫懷中之錦蓋以手批粉墨旣虞  
椽吏之紛煩腰綰銀黃復患簿書之稠疊諾成鳳尾寧容  
旁涉乎吟謠綬吐桃花奚暇他營夫鉛槧由來不異自昔  
而然乃有起而爲吏邑鮮游民出以圖君案無留牘展也  
號循良之宰綽乎稱慈惠之師而復原隰行春之暇不廢  
吟唔都亭聽訟之餘彌勤繕寫整齊鬼瑣髣髴華陽士女  
之編牆拾散亡依稀汝穎名賢之部釀陶作液菽謝成菹  
彼坐兔園而挾冊自愧迂疎卽飛鳧鳥以出疆徒慚武健  
豈若龔黃合轍庾鮑齊驅旣擅文藻之翩翩復極風規之  
落落者乎且所云古樂府者別歌行趨艷之名岐晉魏齊

梁之體企喻讀曲是不同聲子夜歡聞差無定製夫使聲  
牙拗顛調必妃豨襲謬沿譌字多帝虎則作文仲羊裘之  
讒語聽者哈臺學莊姬龍尾之庾詞聞而嗚噓幡綽祇效  
輦之技郭郎爲借面之粧何如別裁僞體直舉天懷緯昔  
事以今情傳新聲於古意絕無依傍畧少撫摹此高人老  
鐵於焉矜能事於元朝而相國茶陵所以負大名於明代  
也籍甚吾賢不圖爲樂掣丹鯨於碧海此是古人騎黃鶴  
於青天誰爲作者

樂府補題序

樂府補題倡和作者爲玉筍王沂孫聖與蘋洲周密公謹  
天柱王易簡理得友竹馮應瑞祥父瑤翠唐藝孫英發紫  
雲呂同老和甫篋房李彭老商隱宛委練恕可行之菊山  
唐珏玉潛月洲趙汝納真卿五松李居仁師呂玉田張炎  
叔夏山村仇遠仁近共十三人又無名氏二人題爲宛委  
山房賦龍涎香浮翠山房賦白蓮紫雲山房賦蓴餘閒書  
院賦蟬天柱山房賦蟹調則爲天香爲水龍吟爲摸魚子  
齊天樂桂枝香凡五共詞三十七首爲一卷嗟乎此皆趙  
宋遺民作也粵自雲迷五國橋識啼鴉潮歇三江營荒夾  
馬壽皇大去已無南內之笙簫賈相難歸不見西湖之燈  
火三聲石鼓汪水雲之關塞含愁一卷金陀王昭儀之琵琶

琵琶寫怨臯亭雨黑旗搖犀弩之城葛嶺烟青箭滿錦衣之  
巷則有臨平故老天水王孫無聊而別署漫郎有謂而竟  
成逋客飄零孰恤自放於酒旗歌扇之間惆悵疇依相逢  
於僧寺倡樓之際盤中燭地間有狂言帳底香焦時而譚  
語援微詞而通志倚小令以成聲此則飛卿麗句不過開  
元宮女之閒談至於崇祚新編大都才老夢華之軼事也  
乃詭間覆醬偶賸殘縑而市上懸金從無雕本蓋赤文綠  
字幾經羸政之灰餘而玉軸牙籤久患江陵之道盡盈篇  
亥豕既粉駮而鉛昏滿幅烏焉亦紙淪而墨敝韭花已蝕  
蠶尾長鬚徒存鼎上之一鬢僅現雲中之寸爪於是竹垞  
朱子搜於里媪之筐梧月蔣生鈔以國門之板頓成完好  
足任流傳譬之折釵出後再鑿龍鳳之形破鏡歸時重鑄

蛟螭之狀雖或楷上闕文間同夏五行中脫簡畧類呼稀  
古錢掘得銅蚨則輪廓槎牙斷碣捫來石獸則觚稜闕鑿  
然而牆邊擲笛猶能彷彿其聲海上刺船尚可低徊是曲  
周公瑾聞茲妍唱定屬賞心桓子野聆此清歌要爲撫掌  
云爾

陳迦陵儷體文集卷八

宜興陳維崧其年誤

寶應喬萊石林選

吳江潘耒次耕選

弟維岳緯雲叅閱

宗石子萬

男履端

姪洵校

序

壽季太翁八十序

維揚上郡延令名區扶風則鐵市三條雒陽則銅街七里  
星躔鶉火代產文人兆叶鳳繇世鐘右族巷逢驄馬皆知  
鮑宣之家戶有佩刀盡識王祥之宅因翁季太老先生瑞  
應乾符祥徵坤軸望齊孟叔著季氏之勲勞名高僑肸推

行父之正直關西則四世公卿實由太尉瑯琊則六朝閱  
 閱咸藉始興爰自起家乃先作宰循良孔奮界是姑臧惠  
 愛王尊地名安定尋游敷夫中臺用專膺夫吏部毛玠當  
 塗名士乃稱是科山濤典午清流始克其選先生則九品  
 有章六曹無玷貂蟬映日惟掄東觀之英棗戟生風詎較  
 西園之市繼值興朝之改玉早欽哲士之掛冠陋漢季以  
 聲名交扇既為黨論所莫加喞晉末以門第相高復為時  
 賢所不忌瞻烏握粟已覘達者之先幾鑿坏閭門聊誌高  
 人之早見然而天祐善人世推陰德陸家之子弟仕北尤  
 多庾氏之功名辭南益顯兩馮並起已聞繼踵為官二杜  
 齊名寧第夾河作郡時則給諫冠月先生就傅知名有文  
 在手服官稱職義形於言指循三事之中譽譽百餘上

當增屈軼在聖主卒白其忠遠砌芝蘭至慈父益稱其孝

侍御滄葦先生早升華秩歷遷崇階府裏烏啼驗班資之  
 早貴殿前鵲舉訝才望之尤奇惟耽典籍豸冠亦暇即囊  
 螢酷嗜圖書蘭臺亦坐而漂麥性素淡於簪纓時適賜其  
 休沐蓋勤於王事帝極憐仲孺有兄而志在承歡朝特予  
 太公以子況乃穆王八駿悉是家駒孔氏四科無非國寶  
 銅盤晝食則屋列東西金脊宵燃則巷分南北雕龍蠟鳳  
 髻亂皆對食之兒犀靽珠鞭少長盡朝天之客濯龍門畔  
 此為道政之坊鬪鴨欄邊即是浣衣之里又復王氏則金  
 貂盈座卑者位過郎官楊家則棣萼同居幼者年踰七十  
 謝東山之女咏絮無雙王武子之甥過江第一馬援之誠  
 兄子夙有門風王況之事世叔備遵家教姻連戚里步陸

孤輦下名姬婚締強宗紇豆陵天邊貴姓至於一聲捉搦  
全部朝那鸞吟鳳舞皆羊侃之侍兒鵲顧猿迴悉李波之  
小妹柝鈴周匝複道多迷箏板參差曲聲無誤亦有負城  
作宅導水爲園栝栢千章芙蓉渠百畝重岡疊嶂衰延酸棗  
之臺邃壑幽蹊下蠹棠梨之館葢已隱夫冬綠豈徒平仲  
春紅於是侯近青陽節逢玄陸桃結三千之實酒傾八十  
之觴乃有四姓金張三江潘陸天上驂鸞之輩人間控鶴  
之羣以及突廊曲厦舍傍撲棗之隣錦韉雕軒車下翳桑  
之客楊子雲口多蹇吃但解著書管公明膽未堅剛先求  
食酒無不鞠脰戟門承筐綺席彷彿咽三危之露依稀開  
四照之花僕也何人幸逢斯會渡江而謁卓茂已識盛朝  
褒德之侯擁篲而拜伏生更俟他日傳經之歲

崑山盛逸齋六十壽序

蓋聞白蓮碧蕊三千鴻朗之函絳闕瓊霄八百應真之位  
夜摩天上小紅開稱意之花修羅宮中重碧醞延齡之酒  
由來才子籍總屬於青城自古高人年盡班於絳縣豈獨  
范家一老夙號長生寧徒謝氏諸郎早呼益壽玉峯盛逸  
齋先生者吾友中書君珍示先生之介弟也響答堦篋枝  
駢萼附雙丁兩到名高四姓之中七穆三明學在一門之  
內荆山剖玉價並連城合浦生珠光俱不夜瓊瑤映日寧  
誇宣子之環龍雀凌雲詎數茂先之劍無何而中書君簞  
羽中朝蜚聲天室岑之敬雅工詞筆籍甚南陽顏之推博  
極文書翩然北闕爰乃讀士衡之製作爭問士龍傳孝穆  
之科名羣思孝克然而梗柎祀梓雖才地之皆同橘柚植

梨實遭逢之各異蓋先生幼擅清羸長多疾疾沉酣鉛槧  
朱君固不愧五經憔悴稀苓李子則偏嘗百藥攬隱侯之  
腰帶息意紛華循騎省之顛毛何心仕進柯亭有笛敢邀  
子野之知爨下餘琴難入中郎之聽滕曇恭之惟敦行誼  
抗跡顏曾杜京產之不樂時榮希踪臺尚優焉游焉如是  
而已若乃纏綿至性庭集慈烏惻愴人倫園生孝笋番番  
黃髮頻緇內則之篇濟濟青袍羣奉少儀之訓讀君陳之  
章友于兄弟誦周南之什宜爾子孫萬石君之門風刊爲  
庭誥陳太丘之家法肅若朝儀雖以伯子爲難兄猶仗次  
公爲家督至其澤必旁流慈能逮下善人在難皆言緩急  
堪資窮子知歸不以有無爲解劉寬雅量何妨侍女之污  
衣杜老高情一任隣家之撲棗傾身障龍強祖約之何思

握算持籌晒王戎之已陋固已寄襟情於霞外大可暢嘯

咏於風前於是斐几長廊油窗砥室藥欄曲折半齋何妥  
之楊苔坂鬢髻滿徑陶潛之菊棕鞵桐帽摩挲於露濃烟  
淡之秋茗椀爐熏掩映於山曉水明之候室內都無長物  
門前寧有雜賓先生則抱膝微吟楮願獨笑鵝兒榨綠間  
庭瀉下若之醅魚子番紅長日榻太清之帖漏痕釵脚缺  
鬢行間鹿脯羊裙盤拏腕下況復癖愛丹青尤精皴染深  
黃淺絳掩北宋之專家暈墨烘檀盡南唐之能事雲偏滄  
几揮毫而螺髻爭呈蝶欲窺人擲筆而粉鬚猶濕解衣盤  
礴依稀絃外之琴蘸髮淋漓髣髴詩中之畫凡諸妙詣種  
自淨因攬厥多能工由禪喜蓋先生自玉弩斜芒之後久  
持鹿女之經亦珠囊匿曜而來便禮龍華之馱翟泉鵝出



早悟空花落下鵲啼長飯正果楊枝作供詎談鍾岵之鮓  
菰米爲餐莫剪庾郎之韭漉囊淨饌瓶中惟薺葡之花禪  
板潮音枝上只伽陵之鳥此又緇白所以心傾入天爲之  
眉舞者也時則風標日上第五還齊驃騎之名栖託彌佳  
安道常言家弟之樂荀家會食少長皆龍薛氏行觴弟兄  
俱鳳兒扶藤杖悉屬班香宋艷之才孫昇籃輿都爲竹馬  
羊車之秀清門盛事仁里休徵慶花甲之初週驗椿齡之  
伊始僕與玉臣舊聯蘭契雲璈隊裏謬克蓬島之賓畫錦  
堂中冀獻麥丘之祝屬有華軒之授簡爰憑綺席以抽毫  
殺烝折俎敢辭乘韋之先庭實加邁願附輝庖之末

壽徐健庵先生序

節踰亞歲日居狼駿之山律轉初陽星紀牽牛之次五紋  
弱線晷逢南至以加長一寸飛灰候迫東皇而早煖則有  
西豪貴胄南路華卿大夫當服政之年君子正懸弧之日  
時則影袿飛組之輦騶騎雍容懷文抱質之夫儀容爾雅  
攝衣上座非無北海之窮交揚觶升階大有東都之右姓  
莫不鋪張官閣揚厲家門敷華振藻爭誇言論之魁雄散  
綵搖珠備極文章之光麗千篇噴涌沫欲成河百軸喧闐  
門還類市僕也列於蒸房折俎之旁効夫鞠脰鞞鞞之事  
顧諸君善禱競誇有春而有倫詎賤子不文未克以南而  
以雅今夫人呼麟種派出駒王科名烜赫弟兄依日月之  
光族姓通明少長挾風雲之氣一門獨貴五世其昌要爲

六合所習聞亦屬八紘之共見寧須辭費盛稱海若之汪洋曷用文繁溪讚崧高之峻極狀雲霞之色縱續畫以靡工學鐘鼓之音卽噌吰而未省用有一言請陳四座憶賤子褚冠彈缺之秋適先生苴杖倚廬之歲斯時也臯魚奉諱泣不成聲和嶠居憂毀將滅性尋而九重錫賙來天上之哀榮俄焉七日歌虞盡人間之怛愴亦可稍酬湏乳之恩聊慰焄蒿之慕乃猶心摧窆石力瘁敢宮量踰僕射竟辭栢杓之霑齋學太常長斷房帷之入以致三荆田氏穆成連理之枝遂令大被姜肱纒自同功之繭檀藥孝笋感沸忠泉歷稽內行之修足驗天休之集且夫叢殘古本匪同毳扇之華斷爛長箋詎比象犀之貴何來釋褐復事編摩豈有禪冠仍需古單况又東朝餘曷快本清通百亦在

資理宜貴倨温子昇不過馬坊之賤客段干木居然駟僮之細流欲藉子將月且邈若雲霄倘求文舉揄揚曠猶秦越掃門莫恤懷刺徒羞而先生則縑帙連雲牙籤耀日劉秋孫南陽博士雅志通經黃文疆江夏儒宗勤思積學年經月緯沉涵在蟲魚細碎之中輯栢編蒲整齊於亥豕淆訛之日文鋒隳突颯若升峻阪以截熊羆筆陣轟厖霍如洄絕澗而殲蛟鱓何論杜癖詎數劉滂乃若掘門寒峻寵以聲華委巷經師丐之譚論班荆贈紵鹿車駢問字之人倒屣傾箱馬帳溢橫經之客銅溝清泚行我嘉賓黛館扶疎綏予良士鄭莊置驛游龍而駟鐵爭馳齡石飛牋流水則百函並發甚而言信於心屢及窳皇之外義形於色交溪杵臼之間吹篴客到肯緣急難以爲嫌織屨人來遑假

有無而自解其嗜書也如彼其得士也又如此固宜其風  
規朗暢氣凌袁灌之浮沉義烈區明目短原嘗之輕俠也  
抑聞借臆攄情則啼笑猶虞其或假代人頌德則情文終  
患其多虛何似脫駮越石直陳晏子之深情寧如貨廡梁  
鴻自寫伯通之厚誼僕今凡鳥走也窮魚夙無結納之資  
素乏風飈之望黥奴詘辱人皆姍以爲愚路鬼揶揄世競  
嗤之曰鈍雀來楊館謬托雕梁燕赴張巢叨依廣廈是卽  
升天入地奚能殫厥形容繪影鏤空不足窮其纖悉也遂  
逢大衍之辰爰效華封之祝丹丘不遠獻斯言請居乘韋  
之先碧海非遙舉是觴願祝岡陵之始

壽閻再彭先生六十一序

雕蟲末技壯夫之所羞稱刻鵠微長高人之所不錄而崧  
猥以一室居貧十年少賤豪門戩穀輒憑翰墨爲兕觥貴  
客添籌聊飾文辭爲羔雁紫綵步障半綴蕪篇青瑣華軒  
恒懸鄙作然而意所不期情難自展平流祝嘏專尚鋪張  
薄俗祈年惟工頌禱語夫世德人人皆七葉雙貂述彼家  
風戶戶悉一門千石樓臺起處無非阿閣之三休甲第成  
時多是長廊之中宿金蓋玉鱗薦自蓬池冰兎霜蟾來從  
桂殿青琴檀舞矜十五之緞腰絳樹能彈訝一雙之緞手  
曾無故實但涉形容況復齒近期願雅多猜忌年踰不惑  
便學拘牽或當榻管以成文每慮轉喉而觸諱中山聞樂  
之對奚可施之歌舞之筵次公仰屋之談何堪妄豫賓徒

之末乃有生申吉日翻爲騎省之悼亡揆覽靈辰猥作子山之思舊顧鄙人而授簡命下走以摛詞是則欽承曠達雖渺慮以奚辭便縱清狂遂放言而不顧者矣淮安閻再彭先生者吾友百詩徵士之府君也譜其州里則地入并汾詢厥門楣則望齊狐趙椒偏善衍着籍關東喬亦能遷徙居淮右家近劉安城下代有神仙宅連韓信橋頭人多節概先生則幼嗜縹緗長耽鉛槧侯子瑜居貧篤學暮卽夔柴高文通處困攻文晝而漂麥子雲之頗精筆札極似相如君山之最富典墳何知猗頓加以室有同心人能偕隱章臺走馬之暇張敞則間事畫眉南山種豆之餘楊惲則還聽鼓瑟蓋先生德配實惟丁太孺人云孺人以濟陽人也競美簪纓敬禮門風兼長文藻周南禮矣傳於

珩璜韓姑爛其播徽音於篋篋委禽以後交推桓氏之少

君七雁而還人說梁家之德曜若夫眉旣能齊齒尤相若

弧懸尚右剛聞葇莢之纒週悅設從西復在茱萸之上浣

是以庭闈洗犂龐公則每展一年子姓承筐鮑母亦時逢

九月曾寒暑之幾何乃家門之非昔盧家之金椀猶在人

間羸女之瓊簫竟歸天上先生則齒屆六旬孺人已沒將

三載斯時也庭萱不再籬菊猶存甫逢絳縣之期正踐丹

丘之祝嗣君曰今無可待願大人姑謀一日之歡先生曰

事以如生詎阿奴竟忘疇昔之事必也重循徃例還待來

年疇能贈我須爲破末季之拘攣假以貽余母或蹈時流

之剽襲庶其並提存歿不令闔德之終湮極序平生竊冀

老懷之暫慰乎於是祥琴乍鼓引滿何傷莊在纒歌舉栝

亦得此所以數高門之上客舊有三千問居士之頭銜新  
標六一也斯一事也有諸美焉慨自庶姬驕蠱匹婦愚蒙  
名不結於儒林性寧諳夫古籍以致馮敬通之僮奴頭無  
釵澤鄭康成之婢獲人在泥中甚而慣訴殺牛惟欣射雉  
莫習蘋蘩之節誰修翟萐之儀此則雖饗同牢而曠如秦  
越縱居一室而渺若山河何由戀德人已去而腸迴孰令  
懷賢跡雖遙而腹痛今覽所天之顧慕益知淑儷之幽貞  
敬頌孺人斯美一也且夫新婦有言士兼百行古人所勗  
人重五倫若使谷風召怨室家抱王郎天壤之悲曠日渝  
盟妻孥與生世不諧之恨倘非守正宋弘何以結信於君  
若令虧恩吳起必至見疑於友今也遺簪不棄足徵至性  
之純故劍偏求用驗天親之篤卽小可以知大觀性可以

察來敬頌先生斯美二也更有難焉凡爲子者階前萊彩  
惟傾延壽之觴園內潘輿徒藉長生之枕斟酈縣菊泉之  
水自許承歡采葛洪丹井之砂相矜愛日未有善體親心  
曲全高尚常聞古語延年則惟畏貴人以況前賢曾替則  
還生孝子共傳我友真得卿狂敬頌嗣君斯美三也於是  
侈陳三善賤子旣搯觚揚觶而前競祝千春衆賓爰拾級  
歷階而上惜哉廡下已無昔年舉案之人幸矣樽中尚存  
昨日登高之酒



贈閻梓勤二十初度序

友人百詩長君牛鹿先生孫吾叔僧六黃門孫僧也

劉伶臺澗時出酒雄韓信城孤代生劍俠漢淮南著書之

地賓客豪魁枚少儒作賦之鄉才華斐亶則有并汾右姓

狐趙名宗少蜚雛鳳之聲長被伏鸞之目人傳衛玠何減

佳人羣說黃香無慚才子一堂彪固擅門地於髫年兩世

譚遷邁家風於綺歲爾其骨性清剛襟期朗暢絢爛文章

之囿施若雲霞琮琤翰墨之場颯如風雨臨文陷陣目攝

鯁肩突鬢之夫掣筆摩霄氣吞摘句雕章之客書亡三篋

補自胸中賦駕兩京成於座上况復分其餘技足了十人

量厥長才寧惟一石蘸筆作擘窠之字虎跳龍拏調鉛繪

沒骨之圖鶯歌蝶舞髹几則雕鏤金石油窗而箋釋蟲魚

墻邊擫笛何妨脫畧之名樹下搖琴大得清狂之譽謝詠

教弄半由漫興以淋漓感激轟厖聊見徐波之綺麗較童  
鳥之風惠此更堪多倘犬子以同時君應不讓觥觥吾友  
嶽嶽而翁猥於京國朋遊偶說家門子姓熟知婚媾并悉  
干支懸弧值陶令春游之日小字斜川坦腹則南容兄子  
爲妻婦家大阮言之笑噱聽者顛狂詎期羣紀之交更屬  
潘楊之戚爰申譎語用展私親我所聞之古人敬以陳之  
執事士先器識誠哉長者之言人薄輕華允矣先民之論  
輪囷山水經百折而壽始千年澎湃江濤過雙崖而勢恒  
一束相期大雅置身千古而前所貴英賢折節萬夫之後  
并仗左汾爲傅右晉梓勤又字左汾弟訓慈字右晉亦異才也太原府城左汾右晉見唐書  
脊鴿努力會看接翅於雲霄棣萼交柯佇見聯鑣於殿閣  
寄聲吾子勉旃來日之居諸試問君家住者何人之里巷

梓勤居淮之  
竹巷狀沅里



徐母顧太夫人六十壽序

蓋聞桃開千歲知爲王母之花桂實二秋識是姮娥之樹  
風名少女星號夫人瑤扉璇嶺宜春建延壽之宮丹竈瓊  
田不夜築長生之館女几山上鸞吟天姥之鄉珠母洋中  
龍出鮑姑之井然而青天易老碧海多濤夸娥猶助以移  
山媧帝難辭夫煉石河頭娶婦逋十萬之緡錢華頂投壺  
負一雙之博箭須知天上還遜人間彼夫九州富貴之家  
奚啻三島神仙之窟則有四姓貴游五陵甲族戶班魯衛  
姻締譚邢葭萃盡榮戟之宗華跼悉貂蟬之彥箕疇五福  
華祝三多而或者人發其祥天靳其寵東方曼倩之婦未  
見成仙南宮敬叔之妻不聞多福霍驃騎齊名博陸稽家  
乘者祇稱異母之兒班定遠接踵蘭臺修漢書者猶賴大

家之女至若蕙誇軾轍宋羨郊祁此皆雙鸞交輝未必三  
柯競爽燕山五竇詎曾並擢巍科洛下三張寧說咸登上  
第設云有是定疑史冊之多夸藉曰其然翻笑文人之善  
謔何圖今日身親見之如我徐世母顧太夫人者太夫人  
德懋珩璜職優組紉幽蘭紉佩幼已奉爲女師香茗裁篇  
長不煩夫姆教爰以鹿邑之名閨歸我駒王之貴胄恪遵  
內則洲旣泳夫睢鳩克相外庭弋又加於鳧雁有無黽勉  
鴻妻窈窕以如賓旨蓄辛勤陶母殷殷而召客遂以德門  
之瑞蔚爲盛世之華剪虬龍之片甲徑欲成雲分鸞鶯之  
一毛便思映日三珠玉樹盡拂青霄滿穴丹雘齊騫碧漢  
彤墀策對羣推杏苑之無雙紫禁臚傳共羨瓊花之有二  
龍樓接武不異庭趨鳳沼羣棲有如家塾矧乃乘龍快婿

復首攀南國之花至於綉虎諸孫又人擅西園之賦大夫

人受斯葑祿釐爾罄宜和風襲襲翼此軫軒旭日朧朧耀  
其禴翟謝道蘊解圍逾妙却夫人神明不衰褒綸稠疊踰  
於架上之書榮誥駢闐積若床頭之笏而乃安不忘勤貴  
而彌儉春飈婉婉愛提陌上之筐秋景澄鮮貪響林間之  
杵兼之惠必逮人禮恒自下悃悃澣濯聿修女士之儀抑  
抑笄珈用著閭門之範撲杜陵之棗傍許隣家翳趙國之  
桑時無餓者律應熙春時逢介壽六宮喧笑九天爭侈爲  
美談百禮紛綸千載猶欣其盛事脂田粉碓賜出椒房庭  
實暇辭克於柘館紇豆陵京都貴女饋來芍醬干饒侯莫  
陳輦轂名姬捧到鶴綾萬匹長欄短巷繁燎熏天北壁南  
榮華鐘殷地時則曉澗呈青春巖獻黛枝頭綿羽飛來戴

勝之禽砌畔新萸長就忘憂之草蘓臺百尺無非織女之  
臺崑玉千岡半是安妃之玉崧以不才歡承斯會鳥間石  
燕迎淑氣以爭飛爨下焦桐遘賞音而欲奏今日三  
穆須知稱觥洗竿而來詰朝十叟八公行見控鶴驂鸞而  
至

壽劉太母韓恭人九十序

蓋聞鳳凰六管聲必應夫雌雄龍雀雙環形定鑄夫子母  
丹青所載齊姜與戴媯同編典冊所書季芊與孟嬴並錄  
至若賜來黃玉識是仙姬里去赤城知爲天姥洗頭盆上  
却寒之帳千重搗藥日傍辟惡之香四兩皇娥汎瑟春風  
響穆滿之謠玉女投壺夜月啟井公之粲緋羅天上首冊  
眞妃白玉堂前尤尊壽母則有西王少女身居昴畢之間  
南嶽夫人位列恒華之右如吾劉太母韓恭人者恭人海  
陵上族江表名家水汲鮑姑之井世享大年杏栽董奉之  
林人多陰德幼卽敦詩長而習禮詢余伯姊其遵陌上之  
桑問我諸姑自織盤中之素窗名朱鳥祇議脯漿帳號青  
牛恒勤組紉加以蘭英姓氏藉甚行間香茗才情翩然林

下掃眉才子續成班固之書不櫛書生載入殷淳之集無  
 何人頌春叔時當穠李遙遙華胄妙揀高門奕奕韓侯親  
 求快婿韓康弱女才雅稱夫描鸞劉向佳兒人無慚於莫  
 雁緊誰比玉實繫卯金是時忠孕先生弱冠鋤經頻年種  
 學不矜細咳私肴核乎藝林頗好大言獨改漁夫文圃張  
 安世則博窮七篋朱齡石則才湧百函然而長貧高鳳非  
 無憔悴之言少賤王章大有幽憂之疾易衣而出居賴賢  
 妻椎髻而前出成健婦寒機軋軋相聞董相之園隣火熒  
 熒其鑿匡衡之壁先生既身縮銀黃恭人亦躬膺翟芾尋  
 階藩轄洊歷叅知高車駟馬人誇蜀郡之夫象笏金貂帝  
 念鮑宣之婦往昔有言婦隨夫貴人情不免氣以居移曠  
 觀夫東京紆紫之倫遐轡夫西邸拖朱之客晨曉萬騎

盡室以南征暮憶千車悉舉宗而北指騶軒挈婦第舍相

望魚服隨夫輪蹄不斷恭人獨以家有舅姑隣無疆近一  
 官就道輒辭夫子以家居數載闔門恒相高堂而里食卮  
 匱鱗鰈手自屏當緘管泉麻親為搯作况復庭有廉泉堦  
 生慈竹一門以內每聞自教其兒三尺之童未常笑見其  
 齒又復下陳能克小星善逮家人歸妹色以次而能升穆  
 木葛覃恩雖微而必及泊乎地隕珠囊天傾金鏡叅知則  
 忠以騎箕恭人則貞能矢日生而不愧何殊荀息之君臣  
 隱矣焉文大類介推之母子時則令子孝廉愚公先生者  
 王家誓墓永日思親袁氏鑿坏彌年將母吟成梁父漢丞  
 相雅好栽桑家本潯陽晉徵君差堪插柳恭人復念累葉  
 簪纓傳家墳索雖機雲兄弟何必同行然王謝子孫無妨

一出爰乃和熊教子截髭留賓閉門而躬授生徒晝莢而  
口傳章句於是僧彌爲弟繼薦賢書太傅諸兒羣稱國器  
鳴鐘而食階前之玉樹駢枝結駟以游市上則璧人並轡  
凡諸子姓矯若龍駒維彼曾玄劣猶虎豹迺今歲孟冬之  
月正恭人大壘之辰邈夫人行年九十神明不衰齊田文  
有客三千衣冠畢會橘中十叟並擊雲璈竹裏雙妃齊翻  
寶瑟麻姑獻壽採來新息之珠日姊稱觴織就扶風之錦  
唱天上無愁之曲嬖女意錢賦人間行樂之篇羿妻蹴鞠  
夫人城上夜已三更少女風前人將百歲則有刈琅琊之  
稻酒釀玻璃餐度索之桃筵張玳瑁爰抽毫而作賦佇拜  
母以登堂

葉母李太夫人六十壽序

蓋聞玉衡散彩天邊競說李星鳧昇仙世上偏誇葉縣  
西河女子名已注於銀臺南嶽夫人位自班乎絳闕護庭  
日麗時開長樂之花柘館風輕每種恒春之樹何必廖家  
井上始獲尋砂詎須鄜縣泉邊纔能采菊同邑葉母李太  
夫人者都憲晴原公之孫而編修集虛公之女也蛇蟠笥  
裏代識貴游鳳吐懷中世徵才子干枝繡戟文通武達之  
門二等金釭學士尚書之第夫人甫離毀齒早譽徽柔乍  
卽勝衣旋稱淑慎名齊鍾郝鏘雅韻於珩璜族壓譚邢扇  
芳風於篔簹乃以隴西之淑女嬪彼南陽之象賢時則奉  
常香城公九列升華奕奕韋平之聖國學崙生君六經論  
秀翩翩應阮之儔夫人爰自齊牢泊平降祚太常齋日潔

爾庶羞夫子貧時遺其雜佩迢迢中外爭欲奉為禮宗濟  
濟姬姜俱願師其閭範茲者時逢設悅禮屬加邁星連婺  
女之津海湧麻姑之宅幸通門能知大概為壽母畧綴俚  
詞鋪揚疇昔資皇娥拊瑟之歡詮次艱難博天姥投壺之  
笑今夫穠矣王姬多陳譜牒爛其韓姑每託篇章而或者  
運涉優游時非窻坎劉綱伉儷僅容盡室求仙鮑靚夫妻  
祇許闔門學道吹簫樓上竹無淚以奚斑擊缶田間鵲未  
啼而曷紫假使不遭板蕩將忠臣無建節之年警諸弗遇  
憂危雖孝子鮮揚名之日而夫人則結褵未久遽罹烽烟  
合豎無何條經兵燹蒼鵝兆釁偏增蕩析之悲青犢呈妖  
彌切此離之嘆免田單之老弱實藉沉幾全智果之宗支  
允需明哲茹荼不少集悲何多然而以此言悲猶云未酷

慨自豫亭之下瓊樹恒埋晉井之旁金刀屢折王長史僅

登強仕已嬰玉碎於前羊南城才過立年復蹈蘭摧於後  
蓋崙生君一中副車屢迷岐路乍沉酣而齊物終頽頽以  
傷生夫人則鬢以當門屏焉持戶劑量旱澇躬收安邑之  
租畜縮錢刀先辦形門之稅入室則柝鈴周匝疑過石慶  
之間居家而婢獲精勤咸守王褒之約懷清築罷曩時之  
閑閑依然石窳封來舊日之門楣宛若僉云有禮衆曰惟  
賢然或伯鸞內助第勸賃春濬冲夫人徒工算確才優封  
殖惟爭齊妾之桑術擅贏餘但問西家之棗雖復豐荒鮮  
匱從容井臼之間俯仰兼資黽勉有無之際足稱中智之  
才未預上流之目夫人則器局恢弘機神練達處世值亨  
屯之會知廢知興置身在剝復之交不奢不儉固類負羈

之婦聲徹諸侯還同冀缺之妻名聞列國若乃引經傳義  
 里中倚若長城割宅分田門內尊為家督袒分左右持平  
 總類夫片言屋列東西斷决悉歸其一諾能持大體不詢  
 臧谷之亡羊最薄時榮違計塞翁之失馬一門羣從官方  
 悉稟夫阮姑阿大中郎家訓俱由於丘嫂以至稽康阮籍  
 舉邀品蒸於山妻因而荀粲范汪咸俟重輕於劉母料其  
 才識縱鬚眉應遜為不如測彼神明在巾幗尤傳為僅事  
 加以夙嗜丹鉛尤耽丘索書籤翡翠翫銀鴨之宵移硯匣  
 琉璃聽銅蠡之晝滴成都粉紙雙丸荳蔻之香河北花箋  
 百軸葡萄之錦共羨茂漪書格早擅簪花相誇道蘊詩名  
 偏饒咏絮然而每至臨文間多削藁續班昭之別史無心  
 留以示人教令爛之雜文何意出而問世恒嗚閨閣賢懸

呂覽之書不艷叙斧名挂蕭樓之選流傳奚益顧米亡何

以文為讎勘寧疲庶兒輩知我意耳爰乃德容彌辟遐福  
 逾適會逢周甲之辰適遘敦牂之歲賈家彪怒揄畫錦以  
 眷鞫王氏龍超戲班衣而鞠艷魚軒阮氏佳兒遠過於許  
 竒翟莠大家哲嗣更賢於曹毅義牀對設半鸞坡鶴禁之  
 詞臣温鏡震懸多鳳窟麟洲之上客年均絳縣地是丹丘  
 矧此華筵偏當淑候千春行樂八公跨紫府之鸞七日為  
 人百福颺紅幡之燕夫人則迴環往劫繡佛青鴛感慨前  
 塵飯僧白雀從此雍州無量之寺定現震花嗣今偕廷玉交  
 勒之碑還來四鶴僕也昔與崙生情深謝范今偕廷玉交  
 在紀羣居叨孟母之隣門接延鄉之里遂含毫而製序爰  
 洒墨以摘詞昔日士行宅畔曾分剗薦之餐他時公瑾堂

前長效承筐之祝

賀徐立齋先生新陞總憲序

代相國朱夫子作

蓋聞蘭臺始建標峻秩於三司栢寺初開躋巍班於九列  
聲望踞南牀以上位本司空勲階在東漢而前權侔丞相  
晉室更稱臺主詎沿宮正之名宋時仍曰中丞第易大夫  
之號絳騶赤棒禮極尊崇白簡青囊資兼華貴然而地以  
人宜名緣實副必也道隆尼父始足當方朔之褒如其人  
比趙堯方可代周昌之位從來文囿定產騶虞自昔唐階  
偏生屈軼玉峯立齋徐公物望三君家風七穆弱齡績粟  
夙高照乘之稱綺歲清剛獨稟干將之氣松纒挺幹便已  
摩霄葵始成叢先能向日卓爾伏鸞之目斐然綉虎之儔  
況復柳遐官位夢實先呈羊祜功名人爲預告畢萬之家  
必大厥有明徵田文之戶偏高寧無定數昔人可作姓久



署夫華堂 崑山百餘年前有某公者其科狀元也常夢人以誌之公及來者多賢神蚤胎之金筴 有孝廉某者夢神第時榜姓陸 來者多賢神蚤胎之金筴 以孝廉某者夢神未之史以及戊戌之孫由爰以華年掇茲大物風和紫禁孫以及公此戊戌前事也

先皇特達之知日麗彤雲際薄海雍熙之會公則儀觀偉甚廷臣莫不傾心神彩凝然朝貴於焉屬目

聖人當璧雅重儒流才子垂紳欣逢盛世橐筆侍螭幻之次懷鉛居豹尾之中而或天閑騁裏躡景難攀臣馬驂驪追風每後空荷九重之顧問誰酬片刻之諮詢按轡以思停鞭而待諭茲太僕妙選龍媒俾彼詞臣不離鸞仗參差鹵簿逢天笑之為新掩映乘輿識

聖顏之有喜更以萬幾解暇詎事田禽然而三葉猶苞敢

志蒐彌六飛大觀會學士以旁觀萬乘遙臨許宮坊為繼

視時則絳旃綉繖勢欲彌空隼罕蠡旗光還蔽日圍當合處猶虞駭獸之軼羣陣欲圓時尚怵奇毛之觸網闕如鴟叫雖文僚亦為興霸之聲矯若鷹飛至從官盡效張遼之狀而公則據鞍不動立馬如常臣惟屹若夫豈搏熊罴兕之徒 帝曰念哉是真履虎執憂之士援此一端該夫百行至若行已端方居官詳慎堽筮鼎盛恒聆持滿之言棣萼聯翩私厓席豐之懼處事則當仁赴義軒軒轅千古之前宅衷則集木臨淵惴惴屈萬夫之下雅耽鉛槧酷嗜縹緗傳鶉觚之篋裏饒有異書揚子雲之室中率多奇字不貪是寶所貪者聊蒼洞歷之恢奇平恕為懷難恕者亥豕烏焉之踏駁典墳之富踰彼劉歆鈔撮之勤加於荀勗要

夫至性尤可深言爾其彩袖仁親白華將母嬰情共氣甯氏則家有孤甥篤念天倫汜毓則兒無常父孝子之臚脬修髓養志無方鮮民之祥練虞禫臨喪中禮倚廬卒歲夜號而每學猿啼不內三年晝入而恒遭犬吠以至一諾寧讓寸長必錄華門圭竇之子獎以聲華飛珪跽之倫丐其膏馥誰能無過王輔嗣頗高不怒之風人各有心江應元殊得稀言之益揚其雅量固蠡測以難勝挹彼冲襟冀管窺而莫罄此所以孚於

先帝留之保我子孫簡在

今皇藉爾率其僚屬也先是公以內閣學士禮部侍郎奉監修明史之詔及拜是官仍兼厥職於是館中壽暉院

內班張以余鳴鳥之深交令綴雕蟲之卮語嗟乎與公兄

弟青松締髮亂之交似我遭蓬白首託班聯之誼譬諸草

木何敢差池如彼瑟琴正資調劑起而爲吏詎忘將伯之呼出以圖君只作叩須之賦幸故人之得路欣在位之多賢日者 吳命初頒臺端霜肅 新綸甫渙柱後風生雖宮闈密勿沉沉造膝之嘉謨而道路流傳嘖嘖伏蒲之讜論敷陳五疏全扛百斛龍文蹇諤連晨早露一斑豹采屬承誣諉用效賡颺此日烏啼府上已膺申錫之榮他時鱣集堂前佇應三台之瑞

賀周櫟園先生南還廣陵序

蓋聞庶女撫膺赤帝見飛霜之異賤臣隕涕白虹來貫日  
之竒理無渺而不通物無微而不格矧夫名應球璜位班  
嶽瀆而乃拾灰馭志於尼父掇蜂悼心於伯竒忠泉遘湧  
溢之悲孝笋罹折摧之懼此則玉馬以殷仁而出地金騰  
因姬旦以籲天者矣櫟園周先生者德挺黃中性鄰殆庶  
袁司徒之家世名重兩京楊太尉之宰裁望隆三事加以  
石奮家風史傳醇謹于公門戶人頌平反蚤膺華秩軍中  
呼公瑾爲郎夙懋陰功邑內以賈彪爲父自栽花而植栢  
預筵崇班由馴雉以乘驄游登華省屬與朝之當璧正江  
左之麤安謂廣陵者北控淮徐衢連闡闡南通吳會戶溢  
笙竽顧自劉渙披猖之後盡苦灰釘抑本高駢狂惑之餘

俱嬰糜爛俗變魚鹽之舊市無執袴之家不藉撫綏奚由  
安哉先生始以兵使者至則投匭不聞揆九罕警茱萸灣  
上時裝陶侃之船楊柳堤邊還麾顧榮之扇三年保障十  
邑謳歌兼之大德曰生至仁不殺保全世族不隳郤克之  
宗擁護善人獲免欒鍼之族環來黃雀識爲啣恩珠出丹  
蛇知因報德固已闢名邗水居然朱邑之桐鄉山號蜀岡  
宛爾羊侯之峴首矣無何移節八閩分符百粵連天瘴癘  
直暗銅標極地戈鋌偏侵石鼓犀兕不返猶推徐福爲仙  
兕甲無憑尚說田橫有島先生則灑涕以談登陴而誓溫  
太真臨流醜酒祇傳忼慨居多傳修期馳檄飛書惟以悲  
哀爲主終焉賊退屹爾城完天子乃嘉厥元功膺斯重寄  
賜之蠶翼掌此島臺爰乃賈生痛哭願繫尉陀徐樂直言

只憂聞越蓋始焉以梁化之忠臣蚤處侯景終焉以晉朝  
之烈士見忌王彌雖深當宁之思已觸要人之怒然而囚  
服還閩猶能殺賊赭衣出獄尚請嬰城藍田箭盡奮徒手  
以射人河橋路窮趣免胄而却敵此則射鳥樓上最可驚  
蒐螺女江邊堪爲動鬼者也奈何忠豈勝讒功難止謗師  
師有位誰憐趙蓋之寃穆穆羣公孰訟甘陳之枉旣間關  
而對簿復匍匐以就臺斯時也三千下客盡願相從七十  
老翁爭思自剄舉幡太學甘拷掠以如飴負鎖門徒棄妻  
孥而不恤俄焉覆盆漸白見覘終消當南箕織罪之時狂  
沙蔽野及北寺論功之日澍雨彌空路人猶以爲寃天子  
遂爲之動金鷄初唱竟出王尊丹鼎將成益思李牧攀龍  
髯而莫逮憐馬角以初生先生遇赦實順治十八年正月

初七日也涼秋八月南下廣陵於是郊迎郭伋皆為騎馬  
 之兒人識叔敖知是斬蛇之客竹西士女競獻壺漿官閣  
 賓朋咸摘詞賦某以不才適逢斯會昔年優渥曾陪明月  
 之樓今日衰遲已作秋風之扇當先生蒙謗之日正賤子  
 履險之辰王成漸老媿賣卜以何能甯武終愚恨素饘之  
 無力淥池不遠望王儉以知歸絳帳非遙念馬融而思報  
 聊鳴欣慶并序恩私

送汪考功鍾如給假省親序

蕭蕭兮風也燕地從來饒別之區青青者柳邪陽關大抵  
 送行之曲越禽戀煨代馬懷寒潞河橋下單舸聯翩督亢  
 城邊輕裝絡繹爰有望郎亦遵前路其人也犀角名家鶴  
 廳才子門庭蕭寂素無諧際之心神彩端凝最得清蒼之  
 氣在盛朝既頗急此賢至吾黨益難為斯別斜陽祖道瀕  
 行而挽子之袂長笛歌驪半起而攬君之袂賓徒眷戀願  
 紆已授之綬親懿追攀冀緩方適之軫而先生則揮手離  
 亭顧同官而致語橫襟曠野向我友以鳴懷疇昔之辰小  
 人有母蓋以故鄉婺歛僑籍蘄黃此地實當三巴百粵之  
 衝向年屬有稀突鴟張之事時則苴蘭賊騎漸斥武昌洱  
 海戈船直浮夏口烽火照劉郎之泝鼓聲聞樊姥之山陶

上行作鎮之地棧閣千盤庾元規長嘯之樓波濤萬斛倘  
若藏身鄉隴誰爲君側以馳驅如其戮力京都疇過親闈  
而定省兩端莫決終傷時事之多艱二者交縈尤念皇塗  
之未靖時則金牛堆畔灑淚登舟黃鵠磯前束裝別母遂  
攝官而承乏爰投袂以從王寧糜好爵正天家有事之秋  
匪慕清班媿世上偷安之輩白雲北望恒切關心錦鯉南  
來彌其承臉何意別離以後屢動軍愁羈宦而來頻叨鄉  
訊故園鄆郡偏遭鐵額之燒焚舊業新安洊值銅脛之倖  
掠紅知賊火焰烘黃帝之丹爐白是刀鋒冷逼烏聊之雪  
瀑醜松怪栢會此漂搖雲海天都遭茲板蕩杜陵邑井倍  
牽遊子之腸使信江關易入征夫之夢至若此離甫定卽  
屈金妃設悅之辰隆燧纒消便逢寶婺稱觴之日高堂七

十長路三千及瓜未追私心何敢以告人休沐方賒臣職

未遑乎將母懷中陸橘長結想於天邊屋後姜魚獨含情  
於日下茲者一官俄焉六載幸蠻荒之帖伏南徼粗安喜  
江介之承平北堂無恙況夫呂公灘畔大有萁鱸吳口村  
中非無稻麥三江鯪美正上武昌之魚一縣笋香不少黃  
州之竹芸瓜負米捨此樂以何求扇枕驅蚊失今時而莫  
待縱復遭迴仕版湛溺時名朝登勲府之階夕畫選郎之  
諾將恐家公致誚說生平畏見貴人父老興嘲謂此君大  
耐官爵吾行已決幸故人鑒余烏哺之私此別無多但來  
年俟我鳳池之上於是南浦霜紅擘琵琶而捉桂西山日  
紫傾鑿落以行杯繞朝贈策羣公旣立馬以歌詩疏廣還  
鄉賤子亦班荆而作序

送汪存庵廣文出都序

宮開碣石正才人委贄之秋閣敞平津尤志士乘時之日  
飯牛牧豕爭思奮跡於風雲附鳳攀龍咸願策名於日月  
於是銅街珂里之胄盡遙雲衢繩樞甕牖之賓半登天府  
鴻都鶴蓋無非爲子求官柳市花宮大抵送人作郡綠蛇  
蟠肘上焉旣符竹之縱橫銀艾垂腰其次亦騶徒之絡繹  
光延宅畔爵弁熏天道政坊邊丹綏溢地於斯時也乃有  
人焉一官落落求爲噲伍以何從十載栖栖欲在王前而  
不得陳編斷簡仍淹伏勝之一經博帶褒衣空負鄭虔之  
三絕叢殘縞綬未階半刺之榮憔悴青衫只壓百僚之底  
堆盤首藉插架縹緗在旁人或訕其迂卽自顧猶嫌其冷  
然而性拙于時韻難適俗壯而筮仕終不離乎膠庠少豈

如人雅習聞夫俎豆畧比抱關之祿自溷師儒還同執籥  
之夫相安冗散疇縻好爵姑策勲於翰墨之場詎鄙卑官  
聯肄業於辭章之圃此羣公出餞共攜祖道之章而賤子  
臨岐亦製贈行之序也僕語未闌君行毋遽憶訂尹班之  
契頗聯袁灌之交綠窗紅燭值肥腸滿腦之秋白酒黃雞  
當鬚奮髯張之候先生旣拔旆以摩旌賤子亦脫冠而免  
胄擲杯以起誰云曲逆之長貧蹋臂而遨自信買臣之必  
貴由今溯昔會幾何時談天客去撫鄒衍以悲來繁露書  
成睠江都而涕下山丘華屋里巷宵迷嚮春吹簫朋游星  
散何期萬事之都非竊幸兩人之斯在蜀鵬再到百年悵  
惘以安歸遼鶴仍還四顧寂寥而誰與陸平原之意氣向  
子期之平生能無惻愴窮塵摩挲昔夢也平時則班馬齊

鳴華軒徐動論心闕下冀他日以能來揮手風前囑故人  
其姑去



送陸五集序

三

惠止堂

南耕席上送潘尊菴入都序

月屆仲春時維下浣桃將作綬草漸成茵會霽景之方妍  
適故人之欲別萋萋綿羽送花縣以長征宛宛新萋汙梅  
廬而小集飛文散蒸客盡江蕭搖筆攜華人皆庾鮑吹簫  
撥阮填紅杏之新詞射覆藏鈞騁碧雞之雄辯航船絡繹  
曉露纔晞燭樹駢羅參旗乍散華堂投轄尚淋漓按拍而  
歌上客更衣已慷慨登車而去僕也河上枯魚枝頭窮鳥  
無緣奮袂言隨祖述之鞭有意揮毫聊代繞朝之策嗟乎  
人非麋鹿志在麒麟事尚可爲君猶未老泰階已正卽才  
人杖策之秋皇路將平乃志士立名之日行矣良朋勉旃  
上國金臺在望知斯行定得風雲玉佩可要只此去難忘  
花月不辭蛙黽用告驪駒

贈陸翼王序翼王自號菊隱

粵以龍蛇之年遂應魚羊之讖普天瓦解列鎮茅靡羸萃  
盡作俘囚欒郤悉班氓隸庾開府著傷心之賦五福無徵  
馮曲陽製自叙之文三靈獲譴斯時也齊國忠臣猶稱王  
蠋楚邦義士尚說包胥落落戈船雨暗吳江之棹蕭蕭戰  
艦烟迷歇浦之帆惟我礪城獨推上谷醜酒而談登陴以  
誓袁本初子弟俱願相從庾元規賓從皆能自效三日哭  
於都城六軍盟於別館當年夏馥曾聞姻婭之親此日黃  
瓊亦有門徒之誼其爲犄角相與藩維然而身頭未白河  
水難清空埋地下之愁不救天公之醉痛龐涓之箭盡兩  
曜無光悲項籍之途窮三川流血一門爭死七尺無歸藐  
爾諸孤行焉將及時翼王陸氏自稱擊筑之傭謬作賣珠

之客重關半夜私出田文復壁三年深藏張儉間關亡命  
猶授孝經涕泣避仇每傳論語齊朝文士半知袁粲之孫  
晉室諸卿漸錄趙衰之後將謂少孤不死庶幾亡者復生  
詎意遺珠又成破鏡王規玉折時事可知徐悱蘭摧天心  
已矣翼王悼初心之已負悲宿諾之無成恨矣沾膺潛焉  
承曉於是鑿坏而遊玩志山泉帶索而遊肆情風月臺孝  
威棲逸息意區中阮孝緒逍遙游思域外風規彌劭玄雅  
絕多遂復採錄遺文搜揚絕學參六經之同異辨百代之  
源流樂此寧疲晷言終老嗟乎照隣失意居惟病梨蕭綜  
去國歌成落葉弔棠梨而無館臨酸棗而非臺湘水三閭  
假餐英而適志潯陽五柳聊采秀以攄懷仙人餌以長生  
藥士固之玩物自名狗彘志遇也

賀老火可新網姬人序

姬性好佛因字曼殊予所命也

會聞初日只出東南又說高樓惟居西北是以中山好女  
能移趙主之心燕市美人堪佐慶卿之酒過邯鄲之里乃  
有鳴箏經淇水之濱纔逢巧笑詎須荆國始留神女之峰  
何必炎荒方誌綠珠之井然而燕瘦環肥要緣風土越禽  
代馬互有便安悲哉北地之高寒逸矣中原之蒼莽人雖  
善睽秋非水以何波女縱工輦春無岫而奚黛纖腰秀靨  
相逢識是吳娥偉幹豐頤不問知爲燕產畧如翁伯史標  
短悍之稱粗比薛公人奉魁然之號每觀賈妃之黑輒思  
衛女之頤加之俗慣皆歲性多伉急尾箕分野婦人皆果  
敢相高燕趙雄風女子亦悲歌成習不諳搽作闔門惟飲  
噉爲工寧解柔嘉戟手以勃谿是尚填書甫判潛積猜嫌

繆篆纔將妄思崖異於今爲烈自昔而然乃有一人洵焉  
獨立張姓則天邊譜牒未是小家吳地則江表門楣原非  
倉楚久隨賓雁偶寄籍於燕山差類傾葵長近光於日下  
疎籬織處青門種樹之翁織籠携來縞袂賣花之媪姬則  
生而明綺幼早輕華鳴蟬薄髮齡宛宛以初笄墮馬斜鬟  
歲盈盈而待字陌頭脫帽競看羅敷國內求婚咸貪陰麗  
不意老狂獲逢窈窕楊還生稔縱調笑以奚妨眉若療饑  
卽蕭條而亦可且夫梯榮慕利人本同情附勢爭炎物之  
恒態倘使秦窮猩豹被極羅紈南金北毳旣克初於箱奩  
煥館涼軒復表延乎衢術則子南之在鄭國人目爲夫城  
北之有徐公衆矜其美以觀我友展也不然原思筮仕仍  
然環堵之家季路居官不離溫袍之色我躬不聞總捧檄

以何懼來日大難較處囊而倍困此卽燕齊智士悉效於

柯晉楚謀臣盡輸籌畫樓緩簸游談於後蒯通掉口辨於  
前未足勸其登車反以資其却幣況乎桓家郡主性極矜  
嚴吳國夫人理多貴倨王茂弘將膺九錫時多悠繆之譚  
劉孝標永憾三同屬有紛紜之論儻陽臺之別娶定怨連  
波如犬子之他圖應悲卓氏或致責言之西至或傳輕舸  
之南浮凡茲風鶴之來正在求鳳之日而乃情堅一諾面  
許三生絕無猶豫之心早斷狐疑之志固已識高絡秀俠  
甚女媧者矣於是雜弄簡編閒親文史畫眉樓畔卽是書  
林傅粉房中便成家塾學新聲於絃上詢難字於枕間硬  
黃紙滑竊書夫子之銜縹碧釵輕戲作門生之贊正恐香  
山蠻桺而此清新還應司馬清娛慚斯猥巧僕於阮婦之

新婚會學劉楨之平視屏前乍見遽訝天人燭下潛窺已  
驚絕世比值同官之被酒屢爲愛妾以微名誣諉彌殷遷  
延未許以姬夙悟淨因新耽禪喜遂旁稽夫梵夾爰肇錫  
以曼殊今日畫廊鸚鵡已學呼小玉之名他時綉襖於菟  
還再贈阿侯之號

顧元山印譜序

蓋聞六書初啟始變蟲魚八法相生未離蝌蚪史游急就  
實開篆籀之金科許慎說文爰定冊書之玉尺莫不音由  
轉注體繫凡將載在雌彘勒之冥豆此則岐揚獵碣岫巖  
殘碑藏之汲冢之中秘在羽陵之內於今爲烈自古而然  
若夫韭花薤葉用識姓名螭紐龍文尤尊符璽尅軍驃騎  
史著明稱買得醜奴家鏤私印旣以珍同荆璧非徒玩比  
隋珠上自李斯下沿吾衍陸龜蒙小名一錄代有雕鏤趙  
明誠金石一書人誇楷隸長箋具在古法攸存然而秦碑  
漢篆恒殉荒陵玉血銅斑半歸寶庫婆娑蒼錄僅留黑闥  
之名捫摸丹青難辨紅陽之姓等玉帳以飄零共金盤而  
嗚咽龍章盡蝕虎氣終埋悼古學之失傳慨新文之日謬

吾友顧君夙工斯體筆將飛而欲落秋螭盤釵字欲整而  
猶斜彩鸞舞鏡點畫作鍾繇之隸愛此空蒼波磔均韋誕  
之書訝其適勁嗚呼亥豕相承墨豬共誚苟成絕藝定足  
空羣填之翡翠長爲鳳閣之奇觀染以胭脂永誌虎頭之  
傑作

陳迦陵儷體文集卷九

宜興陳維崧其年誤

上海葉映榴蒼巖

選

弟維岳緯雲

參閱

宛平米漢雯紫來

宗石子萬

男履端  
姪伊校

碑文 記 疏 誌 銘 跋 題後

靈巖寺重建大殿碑

蓋聞須彌蘭若卽號青鴛洛下伽藍原稱白馬永興推宅  
恒鑄淨果於許詢宜壽聞鐘長託勝因於荀勗絳雲成蓋  
人間開舍利之城綠玉爲階海上現辟支之佛何必蓮河  
慈嶺給孤始解捐金豈惟鷲苑猴江大士方能捨室吳郡

靈巖山者具區勝壤硯石名山離宮標越絕之書張樂麥  
吳都之賦烟濤歎礪朱長文錄入圖經川瀆紛綸孫承佑  
形爲塔記若其旁綴由姑斜垂青巉峯連鄧尉纓綺岫以  
攢霄徑轉車箱剋朱峯而礙日四百八十蒼蒼蒼荀之林  
三萬六千森森菱荷之所縈晴結暝太湖伴佛髻以借青  
蘸水繚烟兩崦共天花而並翠一聲谷響疑賡講院之鐘  
三闋漁歌似亂梵窗之唄筠籠箬箬風送茶舫蕙畝松寮  
雨沾梅屐展矣塵寰之淨域洵哉欲界之仙都爾其沃壤  
眠芊平疇輿衍秋清獨眺閭門之萬瓦爭流春霽遙看茂  
苑之孤城入畫金椎匝路球門牙仗之家鐵埒盈衢里儉  
市魁之窟況復名都故址霸業遺基鬼葵燕麥盡昔王酣  
燕之塲綠水丹山半過客悲歌之地前塵一去館娃無響

屨之廊舊蹟猶存宮監乏承香之港綺羅奕代制愴偏多  
簫鼓何年流連曷極魚山一曲翻成迦葉之居稀巷三條  
難問要離之塚亦曰悴哉吁其怖矣假使城上高臺不游  
糜鹿古來樂事長屬爽鳩梧宮無一夜之愁浣女有千年  
之笑闔閭無恙山中之劍氣還騰伍相重來市上之簫聲  
未歇則秦關錦砌常依繡嶺宮前蜀地花磚永保摩訶池  
上汾河月白年年明鶴雀之樓淮水波紅夜夜浴鴛鴦之  
殿無如珠囊慣解金鏡能虧蕭條棧閣偏增聖帝之悲屑  
瑟關河彌切憤王之恨潮鳴文種空喧賽鼓於傳芭谷應  
公孫祇唱迎神於醉現銀床屈曲徒盛玉女之漿石鏡晶  
熒終類武擔之石此則天親菩薩樂施懺悔之方香積如  
來願仗皈依之力也於是七重闌楯代植祇林五色琉璃

時修蓮界燈燃多寶醒歷劫之沉迷經演三車救衆生之  
熱惱架瓊梯於震旦構紺榭以由旬寺所由來爰云舊矣  
然而迢迢貧里亦有平陂寂寂化城非無隆替河傾酸棗  
波漂鹿女之經談縱咸陽灰燼鴿王之座岢嵒寶樹攀少  
室以恒彫杳靄慈航渡恒河而每涸鬼謀人社濫及花宮  
星貫天錢償之奈苑不有所廢其何以興此千秋金刹每  
苔纏蘚泐於前朝而六代琳宮仍矢棘鞏飛於今日者也  
然其始也廬峯乍闢豈能銀殿飛來漢觀初成未必玉梁  
自下鵲毛徒禿詎便成橋蜃氣空嗟焉能結市不藉鴛摩  
之願寧還龍樹之觀時則沙門僧鑑者妙湧言泉廣揮智  
刃旣貫花而卓錫復插草以唱緣金容再煥艱同夸父之  
移山香界還新勇比秦王之鞭石菴羅之樹又見華開必

鉢之林重聞鳥轉信屬金仙之所護尤資檀信之捐施凡  
諸居士誰非喜捨之蘭陀維我宰官本是再來之摩詰於  
是伐彼青珉鏤之紫篆珊瑚七尺春蠶織無量之碑鸚鵡  
雙栖古蔓綉頭陀之碣



遂安方氏健松齋記

昔者關稱楊葉冶字梅根高臺留酸棗之名別館得棠梨之號將軍營裏樹或干尋故侯陵邊瓜皆五色紅薑繞砌知爲馮衍之家素奈盈墀識是潘尼之宅莫不載在珠林錄於玉海過其傍者攀條而興沃若之思生其後者摘葉而切猗籬之感境由地顯物以人傳然而海易成田陵偏作谷淮王一去竟無仙桂之叢湘女重來并少班篁之點陶潛故里菊已全稀董奉空林杏還不見豈非霜凋楚曉則芝蘭隨蕭艾同枯風悴鄧林則杞梓與榎栴交盡者乎遂安方氏有健松齋焉吾友方渭仁尊公先生之別業也縣名新定表連天子障前山曰武疆遙亘客星巖畔林阜明瑟代產高人水木崢泓生多隱士先生則韋平世胄夙

厭紛華王謝門風惟耽簡寂雖類晏嬰之近市而託興丘園卽同潘岳之背城而結情適軸屢引風前之嘯時披霞上之襟用構小園爰名勺圃夫其涼房燠館映以長川粉壁青垣繚之華薄溯潺湲而架壑渡畧徇以沿堤籬編鹿眼野花碧碧以黃黃浪織靴紋水蓼疎疎而密密左抵蕉隣之舍旁翼桑園右通竹士之軒斜紆琴閣丹曦染幌羣峰獻翠以爭來素魄縈牕疊嶂排青而不去此結廬之勝概而築室之大凡也若夫兒寬隴畔只欲荷鉏陶侃齋頭雅能運甕臺孝威之暇日采藥何妨潘安仁之平生栽花不免效丈人而抱甕命稚子以巾車崎嶇種樹長愧橐駝窈窕尋源還憐阿段此又逸民之勲業而幽士之經綸也無何而祠內狐鳴郭門蛇鬪女子抱采蠶之歎大夫嬰離

黍之悲盜滿平林寇瀾新市蚩蚩競起媳婦傳八百之稱

鵝鶴長飛君子有六千之號盧循萬舸直下嚴灘張角諸軍分馳桐嶺烽搖列郡盡成糜竺之家霧捲千村大類張超之市趙威豪時丁喪亂每被俘囚朱文季運值流離恒遭畧奪斯時也鶴到歸時已無城郭燕將巢處更少門庭周顛早韭半供莊躋之樵蕪張翰秋尊都作王彌之芻牧雖歷歷月中之桂而斧亦相尋縱茫茫天上之榆而波還溢及藥難獨活果只寄生然而頻經板蕩猶存碩果之遺存歷漂搖不改後彫之舊五株屹若狀類秦官獨樹巋然形同魯殿杜拾遺之堂下畧比人長王給事之門邊何知鱗老固已青針乍茁賦客歎其峨峨紫蘚初縈騷人歌其鬱鬱者矣蓋松之來也實於新安許氏之園而樹之植也

粵惟順治甲午之歲時先生之沒已幾閱春秋而令嗣之  
悲乃倍踰疇曩云於是風高暗撫嶷如虎豹之姿霜降間  
哦歛作蛟螭之勢枝枝拘鐵落滿徑之清陰日日吹竿拂  
半簷之天籟王右軍作字若鸞拳桓元子掀髯怒成蝟  
磔蒼皮裂處軒皇媧后之身翠鬣張良廟後永晝亭亭依  
千齡而孕珀根萬載以蟠苓髣髴張良廟後永晝亭亭依  
稀弘景院中巖飈謾謾嗟乎恒河剝蝕百卉俱靡塵劫蒼  
茫羣芳並歇而乃過王家之舊宅尚有庭槐問劉尹之當  
年非無故樹火燒斷節恒換鶻紅月挂枯枝定開華白爰  
修牆屋頓還童射之前游聊固垣墉用誌高曾之手澤并  
成記叙用識歲年登斯堂也或婆娑而賦松耶後有人焉  
應俛仰而思健者

爲嘉禾閩郡士民募建羅天大醮疏

伏以金庭有路還航弱水之人紫府無緣難渡遼城之客  
陳蔚藍之座百千幡搖開笙鶴之壇九微燈朗竊見乙酉  
年閏六月金戈北斷綿纜南浮歲號龍蛇旗翻鳥雀携李  
尤屬戰爭之地江南皆爲戎馬之場鴛鴦湖上長集戈船  
烟雨樓中橫羅鋒鏑崑岡失火瓊琳與燕石俱焚滄海無  
波魚鱉與蛟龍同盡符堅百萬乞命將軍項籍八千傷懷  
子弟登床子反空爲流涕之談飛矢魯連徒有傷心之作  
於是綺寮烟飛鎖窗塵暗連雲畫棟弓鳴屈戌之鈴匝地  
朱甍灰亘罌魚之網田橫之客自殺者五百人白起之兵  
受坑者四十萬戶戶擲臘脂之井皓首同歸家家斷翡翠  
之奩紅顏自落則有南齊公主願生生不入帝王家北魏

王孫誓世世無爲有情物泉途攜手誰悲城下之杞梁地  
下埋魂莫辨行間之襄老胡香四兩難招不返之魂塞笛  
三聲祇恨無歸之骨臺名思子訣再世之金環石氏望夫  
贈今生之寶鏡感均頑艷哀極天人凡茲兵火之倫豈有  
冤親之別三春花長宛矣韶華九陌鶯飛居然風土粧鳴  
蟬於小妾重歡江表之太平飾墜馬於嬌鬟不記關東之  
離亂傷哉若輩抱恨黃墟獨有斯人啣冤白晝王琳殞首  
不逢畢命之辰郭璞糜軀難遇臨刑之日不意九年三閩  
又見雙飛六月之霜忍令萬姓千人終是獨宿九京之下  
因是廣延名羽靜結珠幢法雨長霏洒金鈿於龍女仙花  
永吐靄絳鬢於靈妃用設八關之齋以濟三塗之苦伏冀  
共成良會弘啟仙津揚州瓊觀白玉爲花祗樹名園黃金  
布地則十壺之墓可無悼嘆於臺城袁粲之門不使悲愁  
於白下矣謹疏

相國寺重建藏經閣募疏

蓋聞銀函東啟演八會於雷音珠鬘南翻闡五車於月窟  
竺蘭私記紛披四炤之花秦景遙傳縹緲三危之露金繩  
玉檢豎雪山羅漢之幢赤字綠文建鷲嶺菩提之座曇花  
夜湧色艷浮檀貝葉晨開香浮蔭筍是以貝多羅樹不乏  
燈王熙連禪河無非龍藏須提乞甃則瑤宮之絳節鸞迴  
迦葉拈花則寶樹之華鐘鯨吼肇自經馱白馬已標罕堵  
以傳宗總令運兆蒼鵝猶向恒沙而識刳國名舍衛卽是  
王城園號祇洹便通貧里況復名都金刹香雲薰斗極之  
三上郡精藍華鬘絡房星之四英杯遠汎鵬翼垂天飛錫  
遙臨桂華拂日者哉汴梁相國寺者卽北齊之建國而前  
朝之崇法也直控銅街斜紆鐵市繁臺綺陌路入禪林蔡

河金溝波廻定水賴館迢遙以承露球軒窈窕以相風凌  
雲概日亂良嶽之烟霞挂轉影纓溢樊樓之士女擬諸天  
水此爲麥積之龕較以攝山詎數牛頭之寺固已靈臺翔  
翥下瞰寰區紺塔騫騰上昭雲漢何圖久之不戒於火遂  
使給園鳴吻同石燕以昇天淨土虹梁並銅鳥而沒地噉  
其悴矣能無憾歟無何而 皇清受籙六宇恬熙維地紐  
於珠囊奠天樞於金篋時則翔鷗義殿重開舞鶴之馴馴  
象禪樓再啟濯龍之里規模畧備已具莊嚴抹築粗完都  
爲懽喜惟是暮東京慶華之編稽西洛伽藍之記寺之昔  
日舊有藏經疎以金題度之傑閣乃今斯製猶未復焉撫  
軍大中丞郎公應華蓋之台星履文昌之正位兩河受秩  
百度允釐有廢皆興無地不舉弘告邦人欲還其舊適會

方伯徐公輦法苑於南天轉佛輪於中土已於江寧先請  
藏經全部霞縉溢帙琅軸盈箱凡茲善信共相讚歎於是  
闔境宰官此邦檀越伏念層臺九仞原非一木之功美錦  
千純又豈寸絲之助嗟乎歷億萬劫兵戈以後益販我佛  
之慈受二十載涵育之恩咸賴人王之力可無提唱以示  
因緣所賴涓埃積爲完滿伏願共覆爲山之簣同施不捨  
之檀庶幾樓觀耀日南通洛口之倉畚鋪成雲北運黎陽  
之土竇笈共瑤圖而復旦珠林與玉燭以長春謹疏

王母張宜人墓誌銘

宜人姓張氏山東濟南府鄒平縣人曾祖仁軒公諱一元  
前巡撫河南都御史祖華東公諱延登前都察院左都御  
史謚忠定父扣之公諱萬鍾前江南鎮江府推官母李孺  
人生母景碩人譜其氏牒則張姓連天叙厥門楣則齊姜  
右族三條貴里銅街鐵市之衢七葉高軒蘭綺金貂之第  
宜人幼卽端莊生而敏淑言爲典誥象應畫圖財踰毀齒  
遂工秋菊之銘甫屆勝衣便涉春蠶之館誨誠無煩於師  
氏幽閒有合於風人數歲許字新城翰林侍讀王阮亭先  
生蓋先生伯兄吏部亦娶於張卽宜人從姊也門內機雲  
仍呼僚僭榻中娣姒原屬同生用爲秦晉之美談允作朱  
陳之勝事然而時會前明運丁末造扣之公一官羈絆百

口飄蓬田單之值亂離全宗人以鐵籠杜林之免細弱載  
妻子於鹿車宜人轉徙江淮崎嶇京峴猥以髻亂之辰洵  
抱蓼莪之痛爰乃弱不勝喪哀能備禮銳司徒之弱息流  
涕何窮許穆公之夫人銜悲何已屬興朝定鼎之日爲闔  
門出坎之秋馬角歸鄉時惟丙戌雀屏諏吉歲紀庚寅蓋  
是年宜人實生甫十四云兩姓高門百年嘉會綵羅旣託  
東諸侯之閨闈巋然喬木斯存內夫人之纓裾秩若變彼  
諸姬爛其韓姑高曾在上搵箕帚以前舅姑在旁鳴珮環  
而相婆娑鶴髮方伯公之笈口常嗟婉婉鸞雛兩尊人之  
歡願欲解睠言顧之樂可知已乃其聲高宋子德懋邢姨  
溯夫廟見之初暨彼入官而後始終一致榮悴齊觀攬厥  
生平洵資揚扈當侍讀文禽初委之時正鳳翽將翔之日

宜人則鬻釵佐讀剪髮供餐短布垂垂影亂青袍之色寒  
機軋軋韻諧洛誦之聲勉成夫子之名用繼前人之緒及  
夫一行釋褐盡室之官鞠衣耀日駕文駟以北來畫鷁呼  
風汎淥波而南下而宜人受寵不驚處膏彌潔山河被服  
何心翟茀之榮風雨綢繆不改裙笄之素摻摻筐筥用芼  
蘋蘩肅肅袿褙爰將榛栗施衿設悅承顏在視聽之先宿  
肉異棖養志居口腹之外衣經再澣誰熏省內之香室倚  
一燈不傳署中之粉賜來織綺祇獻高堂製得釵璫爲遺  
太母婉容愉色得諸姑伯姊之歡布惠流慈逮籥翟輝庖  
之賤至若侍讀公者東都有道西邸名賢閣鈴未掣騶已  
哄夫當關巷柝將闌賓尚窮於投轄而宜人則黽勉有無  
屏當鮭菜鵝肪雞蹠旣胸末之咸宜綠醕紅秬亦咄嗟而



立辦以至一雙條脫時供計吏之租車幾緡絢綵恒代良  
人爲贈縞傾奩仗助歡踰京兆之畫眉榜几喧厖快比如  
臯之射雉其淑慎也如此其任卹也又如此固宜其祥鍾  
五福邑以延鄉瑞叶三休封之石窈也維崧間嘗逃稽枯  
菀歷有明徵悉數平陂非無左驗古來憔悴之姬姜多是  
文人之伉儷是故高才失職季女斯饑伯鸞德配舉鴻案  
以增悲仲孺賢妻卧牛衣而隕涕年年盭畝傷哉冀缺之  
貧日日移山惜矣夸娥之拙亦有齊牢嘉耦合蚤華年領  
千騎於上頭列首行之命婦而或者浮雲南北溝水東西  
悲纏盤裏空貽伯玉之詩泣上樓頭長寄連波之錦甚至  
燕去瑤筐蘭凋錦砌弄床頭之綉襦只有緹縈騎堂下之  
羊車何來過未縱使媧皇煉石詎易填愁卽令玉女投壺

焉能博笑獨有宜人殊斯遭遇意者茫茫蒼昊適當醉博  
之年夢夢黃輿亦在滄桑之候乎不知一歸才子未必全  
亨但號上流安能常泰自壬子仲秋遘姑孫太宜人之變  
宜人毀不欲生擗而祈死作婉孌之臯魚壑而泣血效悲  
歌之嫠姊烈以屠腸時則侍讀公方典試西川先是宜人  
又再捐愛子傷心曷極茹苦何多盼刀環於萬里目斷金  
牛埋蓮蕙以連枝神傷青雀沉疴遂篤疾疾寧支名香四  
兩人間無換骨之方菊水一杯天上少延齡之術乃以康  
熙十五年九月初十日卒於新城之里第春秋四十嗚呼  
哀哉千秋灑涕長依思子之臺九日登高立化望夫之石  
侍讀公以十六年某月某日葬宜人於某鄉某原花磚改  
秩雖未分榮寵於紅匳韭葉題旌猶克表幽貞於彩筆銘

曰  
齊魯名家瑯琊著姓猗歟宜人塞淵以敬穆木流徽螽斯  
衍慶頻摧弱息一慟慈姑海乾蛟蜃月蝕蟾蜍筐留玉燕  
墳歸寶鳧樹夢西靡風號北陸千尺喬松幾枝斑竹花簾  
留痕琴歌輟曲旣嫺姆教亦擅女宗瑤姬館寂羸女樓空  
嗚呼令範隧此幽宮

益都馮相國壽詩跋

粵以著雍敦牂之歲月在元枵日躔北陸益都馮夫子以  
三台之上佐躋七袞之遐齡時則縹纓飛組之士羣集國  
門懷蛟夢鳥之賓咸依闕下莫不藉鉛槧以攄忱託箋繪  
而寫志霞蒸綺爛筆欲摩天玉戛金春聲俱擲地其門下  
士陳玉璫彙而獻之弄以一函區爲四頁作者凡若干人  
計詩若干首緙並朱繩裝俱玉軸琉璃滿篋還薰葶苈之  
香齒苔盈箱仍襲葡萄之錦傳之輦下播在藝林亦曰盛  
哉猗歟偉矣在昔槐廳重相鶴禁元僚西京則爵埒蕭曹  
北宋則名齊韓富當其齒屆期頤年踰艾耄兩官祝哽賜  
几杖以入朝五等稱觥班臣鄰而陪位清文燦爛樂奏三  
終麗製鏗鏘音調六佾九如頌嘏無非殿上之金張五福

陳疇大抵天家之岐薛至於援据嘉祥鋪張官閥彭錢斟  
雉未必皆真玉女投驍何常盡實頌揚典故不過六朝綺  
麗之詞役使虛無要皆五利浮夸之術登西洛王侯之第  
便言碧奈成林過東都將相之家遂說青毛降節差無事  
蹟畧助談諧雖昔說之所曾聞亦達人之所不尚今我公  
之初度也芝蘭異氣盡欲揚芬笙磬殊音咸思發響三  
七穆既歌風緝雅而來一介單門亦躡屩擔簦而至甚者  
齊秦烈士汾晉畸人夙標耿介不隨魏勃爲掃門素秉幽  
貞并乏襴衡之滅刺亦復踴躍歸仁激昂慕義欣逢降嶽  
操敝帚而思前幸值懸弧踵高躉而恐後孤竹二君亦頌  
大年於釣渭商芝四叟還歌眉壽於封留龍編鳥篆而  
後固曠百世以難傳暨崦嵫濛汜之鄉亦酌八紘而塵見

若乃辭有旨歸文多倫脊塔前獻賦感萬間庶士之殷懷  
筵上歌詩述三握求賢之盛意挽其在位願黃扉紫禁以  
長歡請必無歸縱碧水丹山而奚慕賡颺莫罄并及於丈  
人屋上之鳥愛戴何窮兼咏夫劉尹當時之樹不學青牛  
關上僅侈諛詞非如朱鳥窗前徒誇撫說崧以菲材獲承  
盛事鐘鳴谷應知感召所從來草偃風行識吟謠之有自  
恭題數語敢爲衆作之前驅敬附一言願托羣公之末簡  
然而游畫錦之堂琳瑯觸目赴耆英之社卷軸連雲長箋  
短幅收之此帙而還羸妙染高文概以斯編而未脩人思  
借錄如披河間之碑客盡傳觀似玩秦庭之璧倘絨篋底  
蠹魚食此而長生設在船中蛟龍守之而不去

題余淡心所藏龔端毅公詩卷後

此端毅公乙巳長安所贈廣霞先生詩冊也公也百僚模楷四海君宗猥於皂帽之儔彌結青松之契縱天長海濶而魚訊恒通值肉奮絲飛而鸞吟間作文無加點筆不能休每當三爵之油油便覺萬言之纚纚發狂言而驚座盡訝神來押硬句以盤空何愁腕脫此則當時驛裏未獲擬其雕華文舉筵前無以方斯敏妙者也僕在京華亦霑歡讌西堂剪燭頗多知己之言北渚揚舲大有消魂之賦情深積劫感歷窮塵曾昔夢之幾何竟哲人之不作流連烟月惻愴關河何意先生眎予斯卷嗟乎賈逵碑上字字生金庾信集中篇篇是玉敬告典籤幸加藏弄勿使蛛縈蠹蝕負荆軻一片之心就令紙敝墨渝存鮑叔千秋之誼

陳迦陵儷體文集卷十

宜興陳維崧其年誤

諸城李澄中渭清

選

弟

維岳緯雲

叅閱

慈谿姜宸英西溟

宗石子萬

男履端

姪伊校

祭文 誄 哀辭 贊

祭王敬哉先生文

嗚呼哀哉地坼幽燕峰頽恒霍珠斗芒寒蒼穹氣薄咸陽  
之樹西靡箕尾之星夜落百身莫贖悼神理之茫然萬驥  
難追歎儀型之闕若臨朝罷講 九重聆訃而嗟咨設位  
盈衢百辟聞薨而震愕蓋賢良道喪固率土之所同悲而

師弟情深猶微忱之所獨覺聲因激楚而不成管以哀傷而難握緬太夫子之遭逢歷古今而烜爍恩榮則位極人臣名位則朝尊舊學一門宗伯後先登八座之班兩世巍階父子饗同朝之樂入直則秩宗司馬共聽待漏之鐘問寢而亞相仙郎羣獻引年之爵箕裘則笏已盈牀堦篋則花皆並萼此雖備福命之崇隆猶未殫史書之揚摧乃其學術醇深文辭卓犖汪汪千頃之波矯矯半天之鶴論事而頡頏韓歐晰理而折衷濂洛詩歌則陶情寫臆笑三唐兩宋之非工纂錄則摘奧搜奇晒夾溱貴與之未搏綜衆說之異同準百家之詳畧寅清議禮定郊壇禘祫之焜煌翰苑陳書兼雅頌典謨之渾噩載於金匱之編副在石渠之閣固猶未足罄其心傳抑豈遽以窮其教鐸蓋躬行心得之際既言有物而行有恒至家庭屋漏之間尤仰不愧而俯不作冲襟而霽月光風粹質則金精玉璞雖履功名之盛貴以彌温卽當耆耄之齡老而逾恪愧賤子之菲葑荷名賢之繩削代侍韋平之函丈久藉薰陶俯窺洙泗之宮牆深蒙被濯廿年之口澤猶新兩世之師門如昨數疇昔之游從景高山之峩嶷保傅而能全韋布之交久要而不負平居之諾挂徐君墓劍曾還大阮之金報劉峻遺書記返潮州之橐不忘良友之成言足慰故人之密託此皆親炙於覩記之頃竊嘆爲至性之肫肫抑卽徧觀於載籍之林亦鮮此高風之嶽嶽惟仁者壽自應優游不死之庭得聖之和奚須別訪長生之藥方共祝夫岡陵遽上征於寥廓何梁木之傾摧詎昊天之渺邈霜淒淒而入幃霧陰

得之際既言有物而行有恒至家庭屋漏之間尤仰不愧而俯不作冲襟而霽月光風粹質則金精玉璞雖履功名之盛貴以彌温卽當耆耄之齡老而逾恪愧賤子之菲葑荷名賢之繩削代侍韋平之函丈久藉薰陶俯窺洙泗之宮牆深蒙被濯廿年之口澤猶新兩世之師門如昨數疇昔之游從景高山之峩嶷保傅而能全韋布之交久要而不負平居之諾挂徐君墓劍曾還大阮之金報劉峻遺書記返潮州之橐不忘良友之成言足慰故人之密託此皆親炙於覩記之頃竊嘆爲至性之肫肫抑卽徧觀於載籍之林亦鮮此高風之嶽嶽惟仁者壽自應優游不死之庭得聖之和奚須別訪長生之藥方共祝夫岡陵遽上征於寥廓何梁木之傾摧詎昊天之渺邈霜淒淒而入幃霧陰

陰而襲幘鵲啼而雪縞千峯狼嘯而風悲萬壑彼人之哭  
公者爲師臣帝佐而悲纏而某之哭公者因世道人心而  
嘆作有蔬載奉有醕載酌聊一慟以陳辭冀神靈之來格

祭同學董文友文

嗚呼我友去年今夜櫟園司農酌余官舍秋霖灑灑街鼓  
礮礮子先在焉倏然以疋廣陵宗生梅新安汪子舟與我  
與君四人而已君時憊甚覓儿而憑食一溢米酒不半升  
余心忤焉口與心計念欲沮君俾無入試君悲久躋誓奮  
文場余言中茹躡喘自傷戰罷而歸江颿若箭東舫西船  
曠焉不面涼秋報罷匿影蓬根日薄虞淵子詐在門嗚呼  
天耶痛纏心髓重趼狂奔哭君百里嗚呼我友交君廿年  
詞壇跳盪文讌流連得草而呼聞音而喜生我者親相知  
惟子子之文章蛟龍雖螭劇休胃腸放爲瑋詞扶電鞭霆  
山移壑飛响嶮岐陽鑊之剔之子之績學博聞疆誦織窮  
蝟翼細穿針孔夾溟後先貴與伯仲射覆發濛應弦而中

子之行誼忠信楷模砥行潔身矜然不污鼓鞀元氣笙簧  
典謨英英哲人煌煌大儒其或少時婞直自遂意所齟齬  
唾猶泥滓壯而折節刮磨淬礪人或不知畏其鋒銳君少  
爲文詭麗萬方中年聞道筆陣堂堂刊落鉛華一歸老蒼  
而彼小儒沸猶蝸蟻疇昔之言憶其八九君曾語我人生  
何有誰爲後死託之不朽誰知君禍遽落吾手一語更悲  
曾顧余云昔賢名集迪功舍人徐昌穀有迪功集何仲默有舍人集最可懼  
者百年奄忽呼之茂才以當官闕何知今日果讖斯言方  
于羅隱萬古同冤而我識君飄飄雲氣百軸龍文扛之入  
地燈闌淚盡濺雨驚砂百靈惶惑萬感槎枒庭空無人明  
河欲斜我之哭君醒耶夢耶倘余未死息壤在彼傳君遺  
文誨君幼子苟或不然臣力竭矣柱絕絃摧報君僅此

公祭大司空在調周公文

嗚呼大斗辭垣喬峰隕嶽鞭扶霆霓隨刊河洛兩儀旣奠  
七政運行元氣滲漉鴻冶陶鈞乃眷南服篤生甫申爲帝  
者師維周之楨國山之墅宋瀆之里俗愿以愨水清且駛  
于門憑焉鄭鄉具邇世育格人宗傳令子晉寧牽絲實惟  
李官犴生綠草郊無赤丸游擢樞曹常侍作奸署篆屹如  
連城乃完出督漕渠星飛芟牧鄼侯轉餉韓滉運粟尋晉  
浙籓豪疆側目霜警銀臺雲驥太僕維彼黃沕自古咨之  
濤孺相牙誰與斲之皇曰司空汝其治之河決捷菑臣實  
尸之毳而畚鍤余薪余竹柔而善嚙余疏余築黃腫之下  
濁泥數斛開泐合黃儲我旨蓄番番黃髮實惟總河幡幡  
韓城居徒幾何厥功旣彰厥身旣退位高心下中明外晦



樂我昆姓勤我灌溉離墨陂隨瀟湖面背元二之際遵養  
從容管床闋若范車相從眉壽若顏偃佺赤松王槐鄭笏  
薛鳳荀龍伯踐曹郎仲官司理叔氏鴻騫諸孫鵠起季君  
直指望壓臺端入親鳳詔出握龍淵豸冠叢業綉斧燐媼  
埋輪以往捧檄而還公語季君幸吾健飯叱馭可師綵衣  
母恩楚幕多烏汝寧或翫芊氏諸豪可縛而按季君拜命  
旬彼湖湘公顧而嬉安坐徜徉謝家羣少王氏諸郎賓客  
盈門丈人樂康公之罄宜榮於邦族公之名位尊於岳瀆  
天不慙遺遠頽梁木鄰有罷春巷無輒哭自公之沒地無  
山川玉女掩媿銅官失鮮自公之沒朝無更老褒德奚封  
蒲輪孰召生爲保傅紫艾金魚玄圭底績丹券分符沒爲  
神明靈旗颯爽乘彼回風以窮蒼莽立德立功君子所居

競此寸陰勗其隙駒公之勲名在狼居胥明留如帶人免  
其魚古之五福惟期頤最令名壽考兼之不易公登大耄  
達人孰媿爲劉公健爲魏公驥人亦有言箕裘實難高門  
華胄或淪卑寒公之哲嗣文犀琅玕公著亢呂忠彥興韓  
備斯三者云何不樂談笑丹丘翱翔度索大鳥朝楊崇碑  
鐫郭百身莫贖九原可作維余小子辱公提撕夙與季君  
壘篋相依同人絮酒命爲蕪詞湛醕申椒靈其鑒之

祭侯仲衡先生文

丙申春暮余客西興翁訪吾翁扁舟是乘畫溪櫓搖銅峯  
 屐登二老風流觚飛爵騰吾翁見背是年夏月孤子流離  
 狂奔吳越遇翁武丘別翁倉猝漬血交頤銜哀次骨嗟嗟  
 余弟謂家四弟子萬十四稱孤作贅睢陽單衣路隅上鮮却公疇  
 憐淳于卯翼維翁立其戶樞自古而然俗疵文雅或與翁  
 言彼陳生者癡王伯輿狂桓子野慎勿與通暱生者寡弟  
 歸告兄嫉彼啁啾兄笈而言彼其何尤翁定知人人言勿  
 憂所恨於中關河阻修余到中原實維已酉滎澤波飛成  
 臯雪走遂踣翁間與翁握手跌蕩詞場激揚文藪宋中四  
 月名花盛開大者如梓霞蒸絳堆翁曰觀乎幸子能來繞  
 燧人陵經闕伯臺老輩誰歟徐公健在躡電追風君家叔

岱吹竹彈絃呼盧博簞食酒衫污拘花帽戴聯旬淡夕喧  
歷譟呼余戲謂翁人言有諸狂耶癡耶夫我何居翁曰非  
癡狂應不誣余舞蔗竿脫身而跳翁果知予仰天大笑桂  
醕重斟梨園再召花竹幽軒箏琶絕調余倚酒悲告翁倦  
游擬欲從翁卜其菟裘翁顧徐公叔岱是謀茂陵小婦爲  
予訪求嗟嗟聚散何常之有欲別翁歸悲難出口餞我城  
東爲余折柳顧語陳生定能來否余揖翁言翁乎莫愁人  
愛賢豪鷹貪臂鞬白日在天酸風射眸余所遲來罰余酒  
籌泗水如油淮帆若箭別翁半載夢中常見昨者南徐浪  
花雪濺睢州使君吳公冉渠召余文讌酒中語我翁竟仙遊余  
驟而疑詎有此不嗣後弟書來自商丘發函伸紙涕泗橫  
流翁之盛德淵濶曾史翁之精明博聞強記天佑善人豈

宜有是反覆徬徨終無信理所可差慰家有瓊琅鳳毛犀  
角巨闕干將司成榮戟令子文章翁無憾矣乘雲帝鄉我  
所聞翁沒之前夜飲類公榮聲如興霸歌板未收金釭猶  
瀉揮手人間奄然而化蟻觀八極驂鸞太清翁齊物化我  
憶交情高山不作流水無聲嗚呼已矣盡此生平

公祭封侍御王太翁文

地摧華岳星圻尾箕三辰瞻靄七曜差池珠悲象罔鳳泣  
長離人如可作天不憖遺嗚呼我翁邦族是毗國尚典  
家推羽儀斟酌謨誥蔚爲經師維翁之父實稱人豪蹠蹠  
藝籍芟除蓬蒿屈此三槐以尹三刀別駕乾州沛其雨膏  
晚而家居人地益高大壘之年樂天遊遨四休先生里閭  
所褒公事乾州益昌厥辭天馬行空脫其轡羈侍大父行  
不爲兒嬉殖學裋躬名翔天遠作吏雲間琴鶴是攜性烈  
才雋貴人嫉之歸奉庭幃縈其佩觿維侍御公翁之家駒  
教之蛾術手口卒瘁移孝作忠循牆而趨爲時直臣位上  
大夫歷筵華班垂金懸珠翁顧而喜其樂只且勉爾匪躬  
勗爾馳驅琉球小邦國之附庸銀濤若山戈船如龍明珠

珊瑚絡繹以供 帝曰臣某汝其往封乘萬斛船鼓天吳  
風發其棹謳鏗茲華鐘臣受而歸告之嚴親翁曰欽哉汝  
母逡巡率土普天誰非王臣無廢君命以殆汝身侍御再  
拜海波鱗鱗將命而歸山川一新珠袍豸冠寵此勞人  
聖朝孝治尤重引年百爾臣僚以暨備員盡推所生用報  
勞賢方期翁壽黃髮華顛享此期頤逸以林泉何天不弔  
逝也溘焉東平靡樹蓋山咽泉嗚呼哀哉涕泗縱橫野無  
耆舊國鮮老成矧於某等忝廁簪纓於侍御公尤篤嚶鳴  
聞翁之訃忉怛靡寧有殺匪嘉有酒匪清臨風一慟用告  
平生

公祭同年陳子遜文

嗚呼哀哉伯牙逝而賞音亡惠施去而微言絕惟友道之  
在人實五倫之居一故大易繫斷金之辭風人賡伐木之  
什存旣喻馥郁於椒蘭沒復况纏綿於膠漆左桃羊角交  
情倍切於死生蕪武李陵友誼更深於離別然覩陳根而  
輟哭猶獲引達人齊物之談邁宿草而弭悲尚得援太上  
忘情之說未有游好方新歡娛永畢甫給相如之札便丁  
賦鵬之辰纔彈貢禹之冠卽會泣麟之日是則罄安仁之  
誅筆何能叙此酸辛殫庾信之銘言未足形茲悽惻矣慨  
資格之因人緬賢豪而同歎鸞何事而受箴桐何爲而遭  
爨問天無買賦之金閱世少翹材之館鬼憎赴洛之陸機  
客笑離家之王粲惟我 皇之盛德邁漢武與周宣旣崇

儒而重道聿籲俊以招賢頓八紘而羅屈宋設四科以召  
淵騫翡翠簾垂殿上寫沉香之句瑠璃匣啟宮中分織錦  
之箋縹緲龍樓詞賦則午門御覽焜煌鳳燭姓名則乙  
夜親填時則紫禁啼鶯紅牆語燕草纈青袍桺飄金線雲  
移雉尾詩成而兩省傳觀日映螭頭賦奏而九重稱善  
千百國實異響以畢臻五十人乃同時而召見詔修天  
祿之書日賜大官之膳繫君才之卓犖最要眇以宜修綺  
歲騰蛟於甬上弱齡綉虎於明州船是孝廉才調則爭誇  
彩筆縣成仙令勤勞則具在黃流慶瑤瑛之見採慚瓦礫  
之俱收吾儕何幸獲偕君子並轡銅街聯鑣金市正擬花  
磚同繙芸史何連茹之彙征遽一枝之先萎依稀昔夕髣  
髴同車火城正盛銀箭還餘星輝輝而半吐河耿耿以將

斜曉風吹夫南內殘月暖夫東華趨朝待漏下直還家音  
徽未沫笑語猶譁人今往矣非耶嗟夫蝶化蒙莊鶻  
迷蜀棧皓月難圓綵霞終散三千里吳關越岫驛路偏長  
十二日金馬石渠流光甚短槐宮之蟻陣空酣椒殿之鶴  
書恨晚我聞天上亦有嬋娟葛洪貴客許邁仙班莫倚蛾  
眉輕爲語言須馴龍性善與周旋保令名於瑤笈享遐祉  
於珠田祗我同人哀悰難剖園內之菜萹徧插已少斯人  
堦前之芍藥徒翻長思我友返雙流而合葬未審何年緣  
一慟以脫驂定知誰某冀暫駐夫靈旗庶來歆夫絮酒

祭徐母顧太夫人文

嗚呼哀哉天姥峯傾皇媧石徙少女風微夫人城圯鵲有  
血而都紅竹無斑而不紫春凋翠水之桃夜落丹丘之李  
盆翻玉女千尋之箭箬何存井竭鮑姑百丈之輓轡長已  
五嶽則羣真失位馳弔夸娥三湘則衆水驚流騰悲嬖姊  
於是荀龍標躡薛鳳摧傷淚浮碧落哭撼瑤閨白馬溢延  
秋之里素車填通德之坊日邊則翟茀魚軒髻而致祭天  
上則朱牆碧翼賻以行喪七日歌虞文士鏗鏘之製千秋  
誅德元公焜耀之章然而頌美終賒揚徽易贖賦羸芊者  
僅許其門第之華誇尹媯者祇數其遭逢之盛雖復穹碑  
槩日高蟠鬣鳳之文縱令健筆凌雲麗燦蛟龍之詠難形  
寸草之心莫罄慈萱之行惟太母之令善在代匱而彌彰

伊早齡之處約覘裕後之方將若乃時甫遭屯家方多難  
 鳳旣摧頽猶爛熳歲無春而匪秋時有宵而曷旦鬼謀  
 孟母之隣人笑梁家之案時則受經膝下課史床前何妨  
 雌伏不受夔憐豈有神方隨羿妃而入月非無微志效漆  
 室以憂天是以金方處礦珠已潛淵荻旣書殘化作行行  
 之玉樹薦經剉盡變成院院之金蓮訝天心之竟爾稔人  
 事之宜然抑太母之艱貞在履亨而不忒緬盛德之持衡  
 詎殊榮之偶獲至乃錢皆萬選萼必連枝陋競爽之郊祁  
 參三駕兩晒齊驅之軾轍邁耦為奇再續元燈掇名省之  
 巍科羣推快婿三喧臚唱奪曲江之上第定屬佳兒斯時  
 也看銅樓之對舞宮袍卽達者將毋色喜見繡陌之交榮  
 彩仗縱高人未免情移而太夫人則談笑無驚神明自若

薰成蓮座飯晚唄以生香織得花機逐春梭而不落貴能  
 思儉鯁雖旨而常封安不忘勞錦自温而每却一坐盡貞  
 觀將相屏間識彼豪英半堂皆濂洛生徒帳後資其酬酢  
 勿以吾為致念房杜何人誰言善不可為富歐宜學是則  
 白麟遜瑞赤雁非禎旣嘉祥之洊集將純嘏其駢臻何圖  
 日在禺中遽返瑤池之駕陽生嶰谷造為元圃之征閭里  
 鮮春人之相街衢多夜哭之聲嗟乎禮備榮哀名標圖畫  
 知神理之彌新寧有生之怛化然而某等纏悲奚極雀未  
 酬恩虵難報德洛陽金盡恒分壽母之釵璫范叔袍寒屢  
 費太君之刀尺感實切於生平遇難忘夫疇昔今年春少  
 霜枯滿路之花昨歲寒多雪縞千山之色藉椒醕之清芬  
 佇靈旗於髣髴



公祭梁老師母吳夫人文

嗚呼哀哉竹頌湘江蓮凋華井簫愴羸樓笙悽緜嶺麝粉  
千堆兔萃萬頃天上春沉人間夜冷維予夫子名在旂常  
家傳鴻案國賁龍章同牢尹姑佐饋姬姜絃調燥濕琯叶  
陰陽萬樹梅開六街燈罷我儕小子羣游輦下並辱提携  
俱蒙獎借問字花朝執經雪夜彩毫揆賦錦瑟填詞公與  
生徒朝斯夕斯值公屢日端居不怡微聞德耀沉疴中之  
我黨私憂時還竊擬天相夫人勿藥定喜何圖惡耗遽入  
於耳未遇金膏難逢石髓夫人閔閱實冠三河一門畫戟  
七葉瑤珂眉分恒嶽錦濯滹沱香奩咏絮綺歲牽蘿鳴雁  
相呼彩鸞旋嫁歸我尚書茜袍珠帕四姓門楣二姚姻婭  
法酒杯傾宮香扇惹尚書昔載誓卧棠村潭園雨歇蕉屋

烟渾看花北郭命酒西園夫人克相熈婉琴尊海國珠洋  
渦漩雪吼帝敕尚書樓船疾走手豢蛟龍口銜星斗夫人  
在家摒檔箕帚枕椰葉黑荔子枝鮮饒歌返旆花鳥歸船  
亞相還朝夫人從焉象服翟衣犀翹爵鈿滿院銅琶一簾  
樺燭下直餘閒闔門休沐粉點鸕鷀硯斑鸚鵡竹脆綠清  
茗香釀熟相妻偕老鮑女雙仙花名並蒂鶴必千年何期  
玉白便上瑤天鸞難膠續桂以香煎嗚呼夫人蘭摧玉毀  
嗟昔文人亦多如是延壽靈光賦成早世豪氣三千弱齡  
廿四名閨韶齒雖與同傷然而遭遇獨擅幃房夫人八座  
命婦頭行榮封一品綵舞諸郎長信宮中月華門左面藥  
口脂釵梁翠朶賜出彤樓捧歸青瑣似此殊恩仙游亦可  
況徵蘭夢早苗苗哥犀鏡綉襟蠟鳳銀鵝芳華不沫金石

誰磨名分月姊位列星娥所未忘悲師門誼在坤範空存  
母儀不再蕙幄消紅松門掩黛敬茗芳蓀公陳哀誄

祭周侍御母夫人文

嗚呼哀哉裳衣夜厥畫翼朝懸白楊噉號丹旄躡蹙嗚呼  
太母家連顧陸韓姑高門邢姨里族嗚呼太母姓著江淮  
三條鐵市九劇銅街嗚呼太母勿傳貞淑頌就春椒銘成  
秋菊嗚呼太母長習周南玉筐迎燕金籠助蠶費委文禽  
繇呈丹鳳疇昔之辰嘉徵入夢吉夢維何爰牖其衷祥飀  
鬣黷瑞旭臙隴黃金鑄印赭繖盤龍歸妹云占相我司空  
維大司空朝之碩輔帝曰師臣人尊尚父在殷伊陟在周  
山甫太母佐之牙衍璜璃峩峩長松松實有枝燁燁祥麟  
麟實有兒枝旣蚴蟻兒還軒翥立成家學增光漢署范有  
純仁呂稱公著維我司空聿生侍御黃金之館白玉之堂  
慶雲霏霏湛露瀼瀼天子命之爾司文章太母尸饗和熊

以嘗燕趙之都瀟湘之澣一戴牙冠兩持繡斧天子命之  
爾維殿虎太母曰咨上帝臨女疇不有尊惟太母尊副笄  
六珈和鸞在軒疇不有養惟太母養饌玉炊金分大官餉  
疇不有伉惟太母伉衮衣耆耄翟芾以相疇不有嗣惟太  
母嗣手握大斗斟酌元氣潘輿正麗萊彩方妍我儀壽母  
克享大年何期玉女遽下雲駟霜摧嶽嶺日沒芝田嗚呼  
哀哉某等諸人曩偕侍御梓澤南皮流連笑語交同班范  
誼甚雷陳翳維大母截髮留賓曾幾何時感難去臆奚當  
茲日遽罹斯戚雙流反葬百兩迴旌少女離位夫人去城  
巷惟罷市鄰爲不相而我諸人倍深愀愴蕙肴載俎椒醕  
盈尊雲旗少留聆此鄙言

楊俊三誄

維癸巳年七月某日余友楊文學俊三焯卒嗚呼哀哉玉  
樹徂春金刀掩夜淑問猶宣惠心永謝嗚呼哀哉君才調  
英竒篇章卓絕言泉流吻思風扇臆剖玄晰與纖若蟬翼  
鋪文雕采縟似龍梭南朝人士眷爾清新東第衣冠嗟其  
綿麗加以德性幽婉標舉簡令神鋒內斂道器外張雋不  
累理淡不却物故能靜表溫純動形潤栗弱年綉虎雅擅  
綺才髫齡蠟鳳頓饒妍慮雄辨驚其父客高名廁於時賢  
譽重南金價伴東箭泊平運丁百六世遭陽九令先府君  
維斗先生忠構身危義積家禠石城哀下白下悲袁君時  
竄跡倉皇邁會孤露程嬰轉徒私匿其兒李燮饑寒但依  
其姊吳門乞食合浦賣珠晨繁絃以引悽昏促管以會泣

令伯陳情之作極此纏綿右軍誓墓之文彌爲悲惋無何  
軍書少弭戎馬暫寧親串稍通音問嗣會丹輪於城郭  
時有唱酬修輕苔於几闥不無贈答時則金聲逾振玉色  
罕渝朱齡石百函並發劉穆之五官互用巧心所濬酌而  
不竭惠匠所琢剔而益麗樵蕪不爨終焉而已將謂務疎  
道親身阻意泰保幽貞於物表栖軒冕於塵區永爲蒸藿  
之夫甘作丘園之秀而人惡其潔天墜其芳猥以虎豹之  
姿竟際龍蛇之歲情深撤瑟慟擬登床春秋二十有三禩  
衡臨沒之年尚虛其一終軍奄逝之紀祇過其三夫人乃  
松陵吳茲受先生淑女而吾友弘人聞夏漢槎賢妹也劉  
氏祭夫手調薑橘徐姬答外情綢鏡釵鳴呼哀哉爰爲誄  
曰

兩儀肇始皇降分區乾坤盤礴氣數昭藹靈鍾牛斗寶產  
勾吳頑艷靡均清濁鮮符猗歟是人洵邦之彥秀外惠中  
曰温且善學圃增泓文峯日倩宅心簡栖措躬澄練旣稱  
第一亦曰無雙藻焯陸海麗甚潘江文明映物經緯萃邦  
清瑟聿拊洪鐘旣縱命之不猶國家多難袁有愍孫顧惟  
元嘆申志悲涼遣言哀斷雜作豫厠浮沉稽鍛時衰齒盛  
道蹇業隆雕鏤羣象染綴化工明詩習禮誦雅歌風魏雀  
辭金漢盤泣銅豈其王頰不如沈勁奈何伊人不永其命  
大火流輝玉衡移柄巷軫絕絃衢凝分鏡南皮曩侶北府  
名儔今悲雨散昔溯風流九京可作萬禩難求青松郭外  
紅粉樓頭

宜城文學公誄

惟康熙十有八年春王正月四日文學砥園施公卒於宜  
城里第春秋七十有八嗚呼哀哉大道淪胥微言放失十  
室之邑衆喙爭鳴一閤之市百家競作俗儒奉夸毘爲指  
歸曲士緣辭章爲傅會轉相剽竊祇益波靡推厥所由本  
之先撥要其教不基之門內則葛藟之誼靡敦學不本之  
躬行乃鳴鳩之仁未渥也施公生經文煨燼之餘當人心  
陷溺之日而能汜濩醇風彌縫絕業裸之以藝彪之以文  
源始門閭達於鄉塾慥慥乎抑亦光輝篤實之君子矣天  
不憖遺哲人其逝時則公之猶子愚山先生受官輦下儻  
舍都亭悵噩夢之宵徵痛訃音之旦至遂搏膺而相告用  
拔血以爲言蓋分雖叔父而誼篤所生服止暮年而情隆

自出馬伏波之誠兄子造就居多第五倫之鞠弟妹恩勤  
不少聆愚山先生所序述則公之崖畧可知矣崧也景至  
德之難名緬遺徽之未沫揄揚莫罄敢搖筆而成郭泰之  
碑涸湖靡從爰綴文而製展禽之諡誄曰

厥初生民萬彙芸芸權輿遠古原始皇墳剛柔攸判仁羿  
爰分孔學惟聃軻乃闢荀嬴蟠典籍羣言牴牾漢工箋疏  
宋精訓詁異派同臻殊塗畢赴宰我堪雕顏回可鑄猗歟  
濂洛發源泗洙道求實踐爰繫中孚而彼末流相沿詭趨  
盱江龍溪淪玄龔虐薪盡思傳文衰欲起姑山莪莪句溪  
瀾瀾疇紹前賢曰中明子主敬存誠致知窮理二子競爽  
述明砥園棠華並鞞篋唱交宣思擬象罔悟絕言詮家推  
會史人企淵騫鳴呼迷明不幸早世僻彼藐孤疇依疇字

疇為含哺實維叔氏茹我以茶冰見以淚遺雖漸長奮翮  
天衢為國名臣為時大儒臯比泰岱觀察鄙湖服官講學  
與古為徒公喜而言是兒可教資父事君克忠克孝石奮  
家規延之廷誥詩咏素綵爾惟則倣姪官於外公偃林泉  
敬宗睦族立塾置田樂公建社原氏名阡朝曦夕魄幌雨  
籬烟趙禮推肥薛包讓產每逢家諱恒虔祀典肴核維蕝  
豆藎有踐老則兒啼祭焉必泣隣有死喪賻之祿之族乏  
窶乏衣之食之有窮者鰥若敖餒而丐錢營婚資其悅禍  
劉君伯陽公之老友敗屋陳編苔纏蝸繡歿於公殯耐之  
營右三尺殘碑大鐫誰某敦仁處義履信懷貞遇人急難  
赴義如爭其或負公肱篋攘籬搖首置之流觀太清敬亭  
翠抹琴溪雪濺卯歲輕帆與公一見漉酒邀賓剪燈張譙

語必纏綿詩皆雅健謂公淳樸定享期頤何圖奄謝遽至於斯公之猶子適宦京師去官度尚恨不同時賭墅棋收竹林觴罷歎鳳嗟麟傾河坼華我觀今古總悠悠者衆庶馮生庸愚怛化而我識公學定神全彭殤一致生死齊觀中明祠內蕉碧楓丹繼志纘緒復稱二難我獨銜悲百身難贖國鮮典型邦無耆宿顏愴淵明潘哀汧督敬撰蕪辭冀颺芳躅嗚呼哀哉

嘉定侯掌亭先生誄

某年某月某日嘉定掌亭侯先生卒嗚呼哀哉慨自陳寶雞鳴翟泉鵝出君子則將成猿鶴賢人則遂值龍蛇練川百里既三戶以無成上谷一門旋五宗之同盡褒融并日舉畢命於灰釘盱眙同時並捐生於斧鑕雖呂錡射月事原無補於存亡而夸父移山誼則總關於家國亦曰瘁哉於乎怖矣先生則危也猶存謹而獲免晋家趙武幾同置袴之危楚國伍胥頻蹈覆漿之難亡命則秦關趙廁之內踪跡偏多謀生則販脂織薄之餘生涯絕少將軍臺上序舊事以悲來國士橋邊逢故人而泣下門前客到盡傳元節之難歸海上人來或曰邠卿之尚在靡能有定亦有何言既而雨不終朝雪還見現值新朝之當璧每示含弘遇



聖主之承乾慣存寬厚名除北寺終全李杜之家門運啟  
南朝免錮袁劉之子弟弱齡去國壯歲還鄉荒蕪綠野之  
莊憔悴黃冠之約乃以藐爾之王頰竟作哀然之周黨燕  
仍巢於梁上三月樓臺鶴乍返於人間千年城郭時則赤  
縣昇平黃圖豐暇庶邦卿士非無三明七穆之儔列國知  
交屬有贈策班荆之事西園則徐劉應阮南國則顧陸朱  
張蒞尉裳之會子產有辭尋玉帛之盟荀瑩是主舟船成  
市車騎如流先生則夙號耆英羣推祭酒文章華貴激昂  
四座之間冠劍雍容籠蓋萬夫之上騁其逸氣譜私史於  
金陀奮厥雄詞蒼高文於玉冊聲齊琬琰言郁椒蘭然而  
酒不忘憂花難蠲忿漸離擊筑初非行樂之資子野彈箏  
詎是爲歡之用念累世原子孝臣忠之裔自有生平況此

身自家亡國破而還何心人世彼交稱袁灌不過志士之  
無聊卽兒命融修或在才人爲有託高臺曲沼半屬前塵  
醇酒婦人無非末路誠恐海不難乾石偏易爛誰云善諶  
陵跖無開口之期何可無年錢叟乏繫腰之術於是羽服  
朝元瑤簪禮醮花深春晚叩碧磬以琅琅月悄秋清吹紫  
簫而寂寂瑤姬圃內惟栽益壽之花玉女窗間祇種掃塵  
之竹謂此間之甚樂嗟來日其大難何圖金竈難成玉棺  
早下八公一去倚桂畔以徬徨十叟不來望橘中而惆悵  
樵人看博驚舟壑以潛移仙子逢棋訝鴻泥之歟滅遂使  
青松鬱鬱長遮樗里之墳白日悠悠不照滕公之室怨何  
如乎悲可知矣每覽寰區私相歎詫極文人之九命慨遺  
恨以三端亦有侵類田蚡小踰臧紇形容關冗哀駘寧足

喻其竒狀貌穉種江神或自嫌其陋君則姿神瓌麗儀態  
傀俄長身玉立灼如天半之朱霞勁翻凌秋矯若雲中之  
白鵠彼今何幸偏工不死之方此也何冤未識長生之訣  
斯其未喻一也又有學昧蹲鴟人譏疥駱王家敬則但曉  
拍張高貴鄉公不知反語此皆高軒綉戟秀齒龐眉君則  
對成孔雀幼已霸於詞塲賦就柗榴壯益雄其筆陣三長  
互擅直登班范之堂五采相宣竟奪庾徐之壘而乃王濛  
不祿謝朓無年何來天上頻葬神仙豈料冢中只埋賢達  
斯其未喻二也抑有惑焉尤其甚者清河獄吏乃聞安世  
之於湯江表叛宗詎意沈克之有勁大抵狂騃之曹間出  
佳兒私疑回遘之家每邀庸福君則三世忠清一門義烈  
闔戶受屠腸之酷瓜蔓葦功舉宗罹破卵之傷株連細弱

乃復鬼不憐才天寧悔禍風吹琪樹不留若水之一枝火  
烈崑岡詎賸荆山之片玉斯其未喻三也嗟乎向子期之  
鄰家笛聲斯在嵇叔夜之柳下鍛跡猶存于春毅魄長依  
杜氏階前三尺桓碑永勒羅池廟後爰爲斯誄以告余哀  
辭曰

余方羈貫文籍是搜或示一編辭條最適作者誰歟嚙城  
六侯英裁綺合壯采葩流余本清狂幼而逋峭腦滿腸肥  
翩然城鷗手把是編獨身而跳扣角狂謳擊壺大叫日中  
則曷月滿而虧惜彼文中蘭凋蕙萎黃巾載亂青蓋旋飛  
雲俱幾道白骨同歸煢煢智舍又弱一個柅園掌亭相逢  
飯顛並泣牛衣雙悲馬磨琴已罷彈篋還寡和掌亭才健  
颯若犀蛟與余握手壬癸之交僧廬酒舫月墅烟郊風荷

百頃露竹干梢我讀我書葑溪之渙同舍三人維侯與計子其龍視人若蟻所不吾如唾猶泥滓譎訖全漏口狂猖而君屹若更復凝然朗如列屋巖如斷山當時介我輕航時搖細浪畫穀半奩綠簑一桁晚而聞道老筆紛披絳園作記石鼎聯詩文鏤碑版句勒盤匱風雷陵厲鱗爪之而所極難忘小人失母馬鬣雖封雞碑曷有君惠大文畀之不朽已矣何言悲哉竟負自君沒後萍梗飛翻一非甫草再慟秬園追維疇曩流想生存雨零宿草雪壅陳根君之哲嗣家駒國寶祖德是遵先疇是保葺君年譜編君文稿命余排次屬余蒐討余才已盡君誼難酬空銘郭泰徒誅黔婁山陽舊雨河清前游昔陪歡讌今斷風流嗚呼

哀哉

尤母曹孺人誄

代宋夫子

維康熙十有七年九月十九日尤母曹孺人卒於家春秋  
五十有八嗚呼此吾友悔庵先生之淑儷而孝廉珍文學  
瑞之賢母也孝廉邸中聞訃旣素鞞星奔麻衣遄返悔庵  
方以金門待詔玉几求賢築館都亭授餐闕下屢申請急  
之所未驗還鄉之夢援琴以哭悽踰巴峽之猿鼓缶而吟  
愁甚衡陽之雁時則燕齊魁壘之士影華組者三千鄒魯  
文學之賓捧珠盤者十九聆斯楚曲咸致神傷況我良朋  
尤爲心痲昔者三年未返還吟零雨之篇六日不詹尚謠  
采綠之什樓前送客界粉成痕陌上懷人結眉表色何況  
瓊田大去碧海無歸廖家智井想竊藥以何年鄴縣寒泉  
擬煎香而無術暫游京雒便爲鶴返之期小別鄉園遽應

牛眠之讖

梅菴臨行時問乩  
仙有牛眠之語

良云已甚亦又何言此則染

湘江之竹未能喻此酸辛彈蜀國之絃不足宣其悱惻者  
矣夫蕙叢早殞元微之所以悲來遺挂猶存潘安仁於焉  
涕下此皆伉儷之恒情何況裙笄之令範可無揚扝用表  
幽貞嗟乎金閨城下遙連齊女之門石鏡山邊卽是武擔  
之路誅桓釐之行爭傳沛國諸生稱陶母之賢競說長沙  
人士爰爲斯製以志予哀其辭曰

余與梅菴門夾葑溪花紅戶向柳綠簷齊俱邀戲馬並載  
聽鸚橋分鷓誤巷肖鶯迷時過君家約爲文社雪霽窗融  
風狂燭炮倦或呼觴豪偏索炙隔帷食器每鏘中夜乃知  
吾友室有鴻妻寧憂金櫟詎諛糠肥貫來村釀乞得鄰醴  
拔釵詎借剗薦誰疲統統鼓聲漏踰三下君爲余言婦真

健者敏既踰班惠偏鑠謝手擷蘋蘩躬親桑柘施衿結幌

習禮敦詩猗歟季女變彼諸姬柔嘉維則淑慎其儀聲高

璜瑀譽溢盤匝愉色婉容承顏堂上婦職攸勤女紅無曠

鞞臆而前鳴環以相私勗青雲頻褰絳帳君言未竟余喜

而呼何期淑女麗我鴻儒間訊他人斯寧有諸人言不爽

君語非誣吳質長愁禰衡善罵我友高才文場雄霸援臂

難封蛾眉不嫁對酒醴呶臨風悲吒晚紆尺組人喜君嗔

噲寧堪伍龍實難馴孺人笑勸一語聊陳不聞毛義捧檄

娛親君顧孺人欣然道左月照城樓天低箭塚白草煎霜

紅旗掣火爲窮塞主亦無不可北平數載綦縞言歡其或

尼君鑄其一官孺人含笑家木吳關非無樵笠亦有漁竿  
椎髻歸田共瓜劖筭梅福雙仙龐公偕隱酒賣相如瑟彈

楊暉絃索宮詞琵琶院本君舞斑衣孺人六珈君悲寔綽  
亦經而麻助君沐柳從君挽車江通孝鯉樹止慈鴉先是  
贈公爲君柝宅舍後一區水雲俱白詎用高薨底須列戟  
俾請於翁於斯偃息君聞是語起舞而旋能如是乎與汝  
偕焉編籬竹次抱甕花間層廊映水小艇尋烟往復循環  
盈虛依倚于門不大古無斯理未在其身必於其子果以  
卯秋佳兒鵲起非惟鵲起亦有鴻鸞拔茅連茹爰應今年  
羣公薦士天子徵賢翹材千百君實哀然竹徑松門臨行  
搔首將我重來能無恙否孺人款語分張詎久白月明明  
爲君治酒西風落葉忽滿長安何來惡耗竟墮君前發函  
妻哽伸紙沈瀾身留北闕淚寄南天來歲新春凌雲賦噪  
府受重封仍膺疊誥而我所悲禮宗是悼香黃壚飛

丹旒嗚呼哀哉

顧夫人哀辭

維康熙某年某月某日合肥龔太夫人顧氏卒於京邸嗚呼哀哉夫人城圯天地爲之無光少女風悲星宿於焉失色七襄機斷五嶽圖懸哀纏寶婺荀奉倩所以神傷念軫瑤妃王武子因而泣下其舊箴登龍新聞別鶴素練一匹非稱誦德之賓總帳三重或有步虛之佩乃爲辭曰

哀伊人之信淑盡時命之不猶悼弗衣之奄逝駕玉軼以周流朝晞髮於層城夕捐珎於中洲發浩倡分揚笙竽練時日兮睠靈修若乃幼習椒蘭長親桑柘三條望族家居鐵鳳街前四姓良家名著濯龍門下旣守禮以稱詩亦歌風而肄雅孫莘之子裙飄琥珀之孟左氏之兒纓拂珊瑚之架至若性多幽靜質本柔嘉草稱蠲忿玉號辟邪四德

秉姬姜之教三從推尹吉之家恒銘秋菊鮮翫春花鏘璜  
琚而應節揆蒸績以披華宛彼諸姑以及伯姊爭傳道蘊  
之芬芳競愛蘭英之清綺訝織錦之能工美揮毫之絕美  
賦成香茗聲傳長樂之宮畫出天仙名滿扶風之市爰有  
東都才子西邸名卿三春迨吉百兩初迎斯時也彈琴司  
馬已非樵悴之年贈婦士龍卽是風雲之日陸子春之姿  
制人士無雙王右丞之詩歌門風第一於是高柔愛婦王  
渾賢妻並住馭娑之側同居樛杜之西月騰窗而皎皎草  
映砌以萋萋紅綬多情脚來夜合金丸有意彈去羈雌張  
敞退朝之餘黛眉親畫潘岳入直之暇纖手同携况復地  
望高華班資赫奕袁司徒東朝世德領袖人倫張尚書西  
維名流交通賓客實內助以相成乃相夫之必力招賢館

內勞五夜之機絲食客堂前散兩宮之脂澤女中班固修  
十卷之漢書閨裏馮謹免萬家之薛責爰乃副珈婉婉掄  
翟輝煌銅蠡咽而未歇銀箭耿而猶長晝掩金屏聽王裴  
之諮議夜夔絳蠟跋潘陸之文章誦威儀於柏府流姓氏  
於椒房至或鮑宣言事偶觸龍鱗竇武上章暫辭鳳闕又  
或唐蒙奉使遠到牂牁馬卿馳驛遙投巴夔間斗帳之香  
寒亦蕙鑪之薰歇思雙笈而已遐舍獨悲而難洩生平離  
別如此而已其他形影靡不同焉洵玉臺之可紀而錦瑟  
之堪傳奈何璇閣摧紅瓊閨悴綠戟門麗日纔彈獬豸之  
冠瑤席凝塵遽罷鳳凰之曲日漫漫而多愁風蕭蕭而猶  
哭痛翡翠之千箱怨臙脂之十斛嗟乎夫人夫子方榮藁  
砧初貴珠袍冠長信之班鈿車驟武安之第榮陽郡主擅



南國之風華尉遲夫人推北朝之聲勢金椀印其餘芳鈿  
盒鏤其私誓嗟乎夫人諸姨窈窕羣從神仙族連灞漣宅  
列藍田小第盤桃花之馬長兄飾柳葉之羈極繁華於斯  
世宜安享於百年胡爲乎壁存遺掛琴留斷絃悵金蠶之  
永鋼傷璧月之難全竟斷悼亡之作音妻永逝之篇聽迴  
風之繞壑流悲曲以結泉嗟乎泉途已宮鏡臺長隔紺唾  
腕而猶華玉魚涼而終熱淒涼思子之臺寂寞望夫之石  
黃腸給大內之錢彤管紀昭陽之筆嗚呼哀哉溘浮雲而  
上征馭漉氣以扶輪叩帝閭而敝辭冀昭質之獲申騷宓  
妃於天衢偕洛靈於雲津襲克堂之蓋蓋羌日暮而愁人  
倚玉女之窗扉盼金母之幌旌眷層思以顧慕聊述哀於  
斯文

王母張孺人哀辭

孺人姓張氏家世由大同徙長安遂爲長安人余友給事  
中王黃湄先生繼室也扶風城下夙傳織錦之鄉京兆街  
中本是畫眉之里父興官都司陰符半帙玉帳傳來遁甲  
一函霜弧射下因君城守粵西柳州故孺人從焉天吳紫  
鳳蹁躑於明鏡湖邊玳殼鈿車妮擗在羅池廟後鬱林紺  
石慣染脩蛾象郡黃柑恒薰織手旣而盡室西旋途經鄢  
郢扁舟南下路次沱潛時則給事君居官安陸出宰江陵  
會逢別鶴之辰續有委禽之事盈門嘉耦迨泮華年若乃  
天上張星應甘泉之圖畫樓頭羸女親灞岍之蠶桑仰事  
則聖廬鬢髻毀以居喪俯育而醜雪丸熊勤能鞠子鳴鳩  
廣惠樛木流慈洵稱巨閥之禮宗僉謂高門之令婦不幸

蘇華早謝蟾彩難圓瑤姬鮮益壽之方玉女乏長生之術  
遂使波衝東渭長流嗚咽之聲月挂西秦永罷團圓之夢  
銜酸曷極流歎何窮給事中徬徨故劍惻愴亡簪人誇彩  
筆彌工傷逝之篇官是黃門慣作悼亡之賦緣余同病屬  
以序哀僕也曾經此恨甫當除服之時何以爲情況屈營  
齋之日香餘幄裏倍知奉倩之愁粉賸奩間偏悉子荆之  
痛吟纏楚些響託秦箏詎曰臨風以慟祗關長史多愁亦  
云載筆而書莫罄桓釐至行云爾辭曰

鄙人逋峭瑟居勘歡惟借給事馥郁椒蘭激昂藝圃汎濫  
文瀾笙必交吹琴無隻彈勝業坊前樂遊原左每值春來  
穠花勝火雨衰干枝晴開萬朶紫葍璘璘瓊葩璀璨隨君  
花下以教以嬉君獨攀條悄焉不怡爲言亡婦雅好惟斯

靚服凝粧擷而翫之房闈繽紛簾櫳葱蒨及其亡也百花  
枯徧君語未終淚承於面時一稚子循於衣畔蘭芽玉茁  
冰膚雪肌君言亡者僅育此兒徒存末婢尚留哀師如何  
奄忽能不漣而宛宛恭人情愔令德巾篔飄颺音容髣髴  
屢易週星頻更朏魄腹痛之悲宛同新沒四載中間嗟余  
越鄉每摘蕪製爲人悼亡虞歌竟篋挽唱聯箱間一臨文  
心疑不祥詎意斯悲我躬游及猶有餘波助君霑臆隴水  
蒼茫秦山突兀勒此哀辭眎茲鑱刻

楊忠烈像贊

代大父少保公  
時嶽年方十歲

江河緯地日月經天誰其參之曰維聖賢 有明御宇兩

楊媿哲前為忠愍後為忠烈嗚呼忠烈秉國之綱英風毅

骨千載芬芳越稽 光宗庚申之季鼎湖升天實公是恃

越稽 熹廟踐祚之秋撤簾卽位實公是謀協律小侯延

年女弟誰在掖房曰李選侍西園校尉北府侍中誰掌貂

璫曰魏進忠故劍雖嗟遺簪莫惜移宮一疏列宗動魄五

侯輦下七貴長安二十四罪宵人膽寒嗚呼忠烈忠構身

禍銀鍊熊王深文楊左棘亭鎖鑰北寺銀璫誰收李固孰

訟王章衣冠之禍劇於姚聖六月霜飛白虹貫井嗚呼忠

烈涿鹿之濱蕭蕭策蹇維予三人應山桐城留丹化碧余

獨何人鬚髯如雪聖人褒卹炳烺乾坤老臣拜頌聯闡忠

竟

郜方壺像贊

彼何人斯吾不能知棄詞華若糠粃視簪組如塗泥神朗  
朗兮赤玉顏燁燁其紫芝弱齡任俠旣遊遨乎五陵之市  
三輔之陘壯年吏隱復嘯傲乎丹山之麓碧水之湄鑑湖  
縹緲雁蕩離竒以觴以咏亦琴亦詩漸遂初乎丘畝爰解  
組以栖遲慨秋臯之墜葉欣春隴之芳蕙斯人也殆和於  
展禽介於伯夷玩世則東方曼倩齊物則鴟夷子皮者乎  
吾終不得而知

胡牧長像贊

我友宗慄偕余遊遨爲言胡君文龍人豪清華奕奕立辯  
泚泚衣薰葶苈墨染葡萄明珠木難干將孟勞我聞鹿鳴  
得食相號又聞哀鴻獨求其曹況我與君誼如漆膠對君  
紙上飲君醇醪傳神阿堵添頰三毛竹西有社廣陵有濤  
射雉他年莫忘如臯書以贈君代余虔刀

跋

宗石嘗讀汪鈍菴先生說鈴一則載陳處士維崧排偶之  
文芊綿淒惻幾於凌徐叔庾予致書王十一曰唐以前某  
所不知蓋自開寶以後七百餘年無此等作矣宗石十三  
歲而先君子見背流離奔走僦居梁園婦家困苦失學僅  
僅黽勉句讀孝經論語之書輒能上口而已間歲一晤伯  
兄卒卒請業莫得其崖畧兄生平所爲文尤擅場儷體然  
不能多也已未歲恭遇 特詔舉博學鴻儒召試 禁廷

璿璣玉衡一賦

天子嘉嘆擢官檢討時論噴羨以爲文章信有神也不幸  
壬戌之夏奄逝京任宗石從黎城來而兄已不及見矣嗚  
呼痛哉聞兄病篤時曾屢詢東海先生計余抵京之日蓋

欲一訣盡付生平著作爲之校梓以卒其願也嗟乎余雖不及見兄而兄之意可想見矣癸亥宗石承乏安邑匆匆簿書未遑謀及至丙寅春迎三兄至署簿書抽暇相與哀輯釐正凡兩閱月計文一百六十餘篇兄麗體之文盡於此矣字句勾校悉遵原本遂捐俸購工付之剞劂閱四月而始竣宗石又嘗聞三兄云兄屬纊前二日念雖遇覃恩而綸音未錫心爲怛怛宗石於乙丑秋遣价赴內府循例請給矣宗石雖不及見兄而兄之所欲爲而未爲者石皆代兄爲之矣嗚呼兄亦可以無憾於九原矣丁卯孟夏弟宗石謹跋於患立堂

跋

嗚呼此吾先大兄迦陵麗體之文也先兄以壬戌年五月日卒於檢討之任予時適在京師視兄疾易簣之前二日執余手而泣曰吾生平所爲詩詞古文吾死後弟爲吾潤色刪定之余涕泗滂沱不能答余詩文遠不逮大兄而命之以潤色刪定之語何敢當兄又曰吾四六文不多固吾擅場之體恨未盡耳嗚呼其可悲也兄歿之二年同邑蔣京少爲遴選鏤板吳門一時風馳紙踊然詩詞只鈔十之三四四六文尚遺失三十許篇且字多訛謬脫落丙寅春余過子萬四弟安平署齋共校訂大兄四六文一月所遺三十許篇旣盡入之集字亦悉改正所爲潤色刪定者終不敢篇數寧存無遺適葉蒼巖觀察相約寄稿刻之任中

第 35677 号

平成 3.11.22

聖和學  
園短大  
圖書館

928

4

5

未果明年余在都下萬弟信來云葉觀察之雅意固在捐  
俸鏤板弟當力任之矣余爲之悲且喜而跋之嗚呼九京  
寥邈絳螭在霄月白風清掀髯碧落吾兄亦可無吟秋水  
長天之句矣丁卯孟春弟維岳跋於京師東城寓中



第	三	卷
三	十一	號
	大	學
	館	藏

周

邊園文集

卷之三

